

METSI A KAMEHLA

A TSOANG LEFIKENG

 Re motlotlo hoseng hona ka Boteng ba Morena Molimo, ho qala litšebeletso tsa hoseng ka ho re nea molaetsa, hore-hore re tlameha ho “mamela, ho apara tšabo” ka pel'a Hae, ha thoe O batla ho re bolella ho hong. Ke tīle O tla phethisa seo A se tsepisitseng. O boloka Lentsoe la Hae ka mehla. ’Me re motlotlo ho phutheha ’moho, ho phela, mose o koano oa Bosafeleng hoseng hona, le ho boela re khona ho rapela Morena hape, le ka ho phutheha ha rōna ’moho le ho utloa ho tsoa ho Eēna. Re phutheha ’moho ka mabaka ao, ke ka morero ona.

² Joale, ke batla ke tsomelitse Moena Neville, ka tšohanyetso, kajeno, ka lebaka la toro e itseng eo ke e lorileng. Eo... Kea lumela ho...’na...litorong. Ke lumela Molimo o sebetsa le batho ka litoro. ’Me ke lorile toro e makatsang haholo, bosiu ba maoba. Eona, e le ha ke iphapitile ka leralla, lephako la leralla le itseng, ke theohela tulong ea ka eo ka tloaelo ke jelang tinare ea ka—ea ka. ’Me ka lemoha, ha ke atamela tulo eo, ba ntse ba letsa ’mino, seholpha sa ochestra se letsa ’mino, ka lifiole, se thabissa batho ba ntseng ba e ja. ’Me ntho e teng eo ke sa kang ka e rata, eaba ke e feta mohoalotso. ’Me ka kopana le motho ea nyolohang leralla. ’Me ka talima, ’me batho ba bangata ba ntse ba nyoloha leralla ho jela tulong ena. Empa ka batla ke ba koekoetla, ke khelohela ho le letona, kapa, ho le letšeheili.

³ ’Me ka mokhoa o itseng, tlase phuleng, ka bona tabernakele. Ka utloa lentsoe la motho, ha thoe, “Kopana le Moena Branham mateanong a hore-hore. O ntse a theoha ka leralla holimo mane. ’Me u ’molelle hore-le-hore ho itseng.” ’Me ka akōfa ho fihla mateanong ana.

⁴ ’Me motho eo ha a nyoloha, ke ha e le Moena Neville a apere sutu ea hae e sootho, a itšoanelia le ha a lutse mona hoseng hona. ’Me a re, “Moena Branham, haeba u tlil'o ba motseng,” ho re, “ho ka ba hotle ho—ho theohela koano, hobane Moena Hank...” Joale, eo ke mo tsebang, e le Moena Hank, ke Moena Henry Carlson, re ’mitsa Hank. Ha thoe, “A ka hopola ho makatsa ha u sa tle tabernakeleng khafetsa haeba u le motsaneng, kapa u le motseng matsatsi a ’maloa.” Ka phaphama.

⁵ ’Me, mono, ka ikutloa ka mokhoa o mohlolo. Ha kea batla ho itšohlometsa nakong e kang ena ea veke, pele ke botsitse Moena Neville hore ebe o tšoere sepeshela sa hoseng hona, bakeng sa kereke. Ka hona o bile mosa haholo, joalo le ka mehla, ho re, “U ka theoha oa tla.” Ka hona, re ka tla feela. Ke mo

letselitse thapama e khōlō maobane, hoseng hona, re kena bohle ka tšohanyetso.

⁶ Joale ke lumela e tla ba ntho e molemo, pele, ho 'na ho-ho le hhalosetsa lintho tse itseng. 'Na, mohlomong, ke mokhelo haholo bathong ba bangata. 'Me le ho 'na ke batla ke le mokhelo, hape. Hobane, ke leka ho sala Moea o Halalelang morao, haufi ka bokhoni ba ka. 'Me hoo ho re etsa mokhelo, lea bona. Ruri re etsa lintho tseo re-re lulang fatše 'me re ipotsa ka linako tse ling, "Hobane'ng nka etsa ena? Ke khonne joang ho etsa sena?" 'Me hona mono u ka hopola u entse hantle seo u neng u sa tlameha ho se etsa. Empa ha u ka mamello, ua ba le tumelo, u khotsoe u tataisitsoe ke Molimo ho e etsa, u tla e fihlela e sebetsa ka tšoanelo feela. Lea bona? 'Me re fumana seo khafetsa. 'Me kea tseba le Moena Neville o e fumane le joalo, hangata. Le baetapele le batho ba moea ba elella seo.

⁷ E se e le nakoana bophelong ba ka moo... Ho bua 'nete, ho tloha ke sa le moshanyana, ha ke eso utloe tataiso ea ho tlameha ho phela mona-mona Jeffersonville. Ha esale e le phatsa ka leihlong, ho 'na ho leka ho phela mona. Taba ea pele, tlelaemete e banana le 'na habohloko. Ntho e 'ngoe, e ka re ho utloahala khatello ea moea.

⁸ Ha u ka menahanya mohlala 'me ua sheba nqa e 'ngoe mona, haeba le sa senyeha mohla morallo, lengolo le amanang le eona le teng, nkile ka khona, khetlo la pele ha ke biletsoa bosebeletsing, nke ka qala ka falla. 'Me Moena George DeArk le 'na...

⁹ Le 'mè oa Moena Graham Snelling, Moena Hawkins ea tsamaisang khoebo ea karache koana New Albany, le batho ba bangata, ba ne ba kopane le 'na tuloaneng ea ho rapela mona. 'Me ba itse, ha u ka lula, ba ka shotisa le bana ba bona tafoleng, ho-ho haha tabernakele, hore ba se tlosoe tulong se seng ho isoa ho se seng.

¹⁰ Mohla ke utloang 'mènyana eo, ea sikileng lesea letsohong le le leng sephakeng se seng, a re o ikemiselitse ho shotisa bana tafoleng, ho haha nqalo ea ho lula le ho rapella teng, ka batla ke sa khone ho e mamella. Eaba 'na le Moena George rea kopana ra qeta ka ho lula le ho haha tabernakele.

¹¹ 'Me mohla tabernakele e hahuoang, ka mehla ea ka re... Hoseng mohla ke khakolang tabernakele, ho hlahile pono, e ngotsoeng lejoeng la sekhetlo mono, mohlang oo Moea o Halalelang o itse ho 'na, "Ena ha se tabernakele ea hao." Lea bona? 'Me ka botsa moo tabernakele ea ka e leng hona teng, 'me eaba O mpea tlas'a maholimō a maputsoa a khanyang. 'Me A nto re, "U etse mosebetsi oa 'moleli oa evangeli," le joalo-joalo, ka moo le tsebang. Ebile e ngotsoe le libukeng.

¹² Lintho tseo tsohle li a kopana. 'Me tsatsi le leng mohla ke ntseng ke hela jarete holimo moo Moena Wood a phelang joale,

'mè matsale a lula mono mehleng eo; ke lutse setepising se ka morao, setepisinyana sa khale sa konkreiti, tuloana ena ke e hahetse 'mè matsale. 'Me e batla e le mohlokomeli oa kereke mehleng eo, a e hlokomela. 'Me ka ho hlaka ka moo motho a ka buang, Puo ea bua le 'na, ha thoe, "Nke ke ka u hlohonolofatsa u tse u lula mona. U tlameha ho ikarola bathong ba hèno le tulong ena." Be, 'na, taba eo ea nkhabela likoto feela, nako e ka etsang veke kapa ho feta.

¹³ Khafetsa, ka linako tsohle, ke lemosoa ke ho Hong, "Falla, falla. Fallela nqa bophirima. Lula u ea bophirima." Be, ke... Ka mehla e a nkhathatsa. 'Me e ka re nako le nako...

¹⁴ Joale, ke ne ke hlakile kelellong ho fofela Tucson vekeng ena, ke tla renta sebaka, ho hlola mono mariha ana; ho kenya bana sekolong, ho qala ka Loetse. Ke ne ke fumane sebaka. Ke bile ke fuoe tulo mono. Empa ntho e teng e... 'Me—'me haeba ke tsamaea...

¹⁵ Ntho e 'ngoe eo ke batlang ho e bua. Pejana re haha ntlo ena holimo mona, ntlu ea boruti, moo e leng teng joale, ke ne ke sa batle ho aha mono. 'Mè matsale o ne a tsofetse. 'Me a bile a llisoa ke eona, a re, "Nke ke ka siea moma mona, koana o tsofetse, a ka tšoha a sa hlokomeloe." Be, ke utloisisitse. Kea utloisia. Ke 'mè oa hae, 'mè ea mong ho eëna, kapa eo a tlang ho ba le eëna. Ka hona, ke utlosositse hoo. Eaba ke—ke rapela Morena, ka re, "Morena, koana ha ke rate tulo ena," ka re, "nkhotosfatse. Ke tla ea hohle moo U mpatlalang, ho tsoa hohle. Empa ha ke batle ho khopisa mohats'a ka, ho mo tlosa mona, ho kena naheng e sele moo a sa tsebeng motho. 'Me ebe ke tsamaile ka mehla, le hona. Nkhotosfatse ho lula le eëna mona."

¹⁶ 'Me joale, 'mè oa hae o nkiloe, o ile Khanyeng, tšusumetso eo ke ena e boela e khutla, lea bona, joale ho falla. Ha ke tsebe seo nka se etsang.

¹⁷ 'Me tsatsi le leng ha baena ba qalile thuto ena ka mathoko, ka ema sefaleng sena khetlo la ho qetela ka le joetsa ke sa tl'o hlola ke kena masimong ha e ka 'na ea tsoella. Ka hona, ka mohau baena ba e otlolla ka bottlalo. E falalitsoe ka bottlalo. Lihoreng tse mashopeli—ne, ke ha ho felile.

¹⁸ Joale hoo ho boela ho mpulela masimo hape. Ha ke tsebe seo nka se etsang. Ha ke tsebe ke lebe nqa efe. Ke kopile Morena pono. Ke Mo kopile ho mpolella seo ke eang ho se etsa. Empa O ntlohetse ke lutse feela.

¹⁹ Joale, maobane bosiu hoba ke tsamaise bana kaofela, mohats'a ka le bohle, ho ba tlosa tlung, ke itlamile ho Morena Molimo. 'Me ke itse ho Morena Molimo, "Ha U ka ntlhohonolofatsa tseleng eo ke e nkang, ke tla U sebeletsa. Empa U tla tlameha ho mpontša ho ea nqa efe, le mokhoa oa ho tsamaea, le hore ke etse'ng." Ka hona, ke itlamile ho Morena. Ka e—ka bosebeletsi le ka ntho eohle, ke e nehetsé ho Morena.

¹⁹ Me ke itse, “Hohle moo U bulang, sohle seo U se etsang, ke tla tsamaea tseleng eo. Ho fihlela U bula tsela, ke tla itsamaela ka bonna ho fihlela U bula tsela.” ²⁰ Me ke Mo kopile ho e hlakisa hoo nke keng ka thetsoa mohlang oo, hoba ke lumela ruri re fihlile mateanong a litsela a ntho e mothating oa ho etsahala.

²⁰ Ke utloile boporofeta ba Moena Neville mona hoseng hona, kapa bo ntšitsoe ‘me ka bo tseba e le—e le boporofeta boo a bo ntšitseng. Joale, ka baka leo, ke le rapeletse bohole, ‘me le lōna ke hloka le nthapelle, hore Moea o Halalelang o nketelle pele hantle feela hohle moo ke tlamehang ho ea teng, seo ke tlamehang ho se etsa, ke tle ke se etse phoso.

²¹ Lea bona, hangata, batho ba hopola neo ea boporofeta, e le Molimo feela o reng “Ke tla u nyollela hantle *mona*, le ho u lulisa fatše *mona*. Joale u ka ea ka *mona* feela.” Atha ha A u bolelle lintho tseo tsohle. Holane A etsa, e ka ba tumelo eo u hlolang ka eona e kae? Lea bona? Lea bona, uena, O u emisa o le mong ho feta motho ofe. Lea bona? Bohle le ka tla ho ‘na la mpotsa lintho tse itseng, ‘me ha A eso hlolehe empa O le file karabo e népileng. Ke hantle. Yaa. Empa ‘na nka Mo kopa lintho, ‘me hangata O ntšiea ke le mong, lea bona, ho ntlohela ke tsoelapele le ho tsamaea ke kena ho eona.

²² Hona joale ke sallane le lintho tse ntlamang ho li rarolla, ke tsoanelia le ho etsa liqeto. ‘Me ena e bohloko—a-hloko, ho fihlela nke ke ka etsa letho pele ke kholiseha hore ke Eèna ea buisanang le ‘na. ‘Me ke—ke... Ha A batle ho mpontša pono. O ntlohela ke le mong feela. Ke lutse joalo ka khutsana feela, joalo, hoseng hona, ha ke—ha ke tsebe nka leba nqa efe. Ka hona, ke e laelelitse ho Morena.

²³ Ke—ke ikutloile joalo nakong eo, ha ke ne ke lora, ke tlamehile ho khutlela mona tabernakeleng ho thusa Moena Neville ho fihlela ntho e etsahetse tseleng. Ka hona, ke tla hlahal khafetsa.

²⁴ Ke kōpil Moena Neville nakoana e fetileng, “Kereke e khatha tema joang?”

‘Me o itse, “Hantle.”

²⁵ ‘Me ke utloile hoba le sa babaletse lineo tsa moea le lintho har’ a lōna, tse sebetsang, lineo tsa boporofeta, le—le ho bua ka lipuo, le phetolelo ea lipuo, eo re sa tsoa e utloa nakoana e fetileng. ‘Me lintho tseo li ahisa kereke, le haholo.

²⁶ Empa eaba kea nahana, koana bosius bona, nka khona haeba Moena Neville... Ha Moea o Halalelang o sa ntataisetse nthong e fapaneng, bosius bona ke batla ho tsoara e... Lōna bohole, pele le tloha hoseng hona, le ngole potso le e behe mona, potso e itseng kelellong ea hao, ho fumana seo kereke e se nahanneng. Ke ka moo balisa ba fumanang se lutseng pelōng ea batho. ‘Me mang le mang oa lōna ea nang le potso, e ngole u e behe holimo mona. Ha u sa tsoara sechechana sa pampiri ho—

ho e fetisa hoseng hona, e ka ngoloa bosiung bona, ka nako. Ka hona, ke batla ho sebelisa nako eo nka e khonang, ho tsona, ho li hlahloba le ho le arabela tsona ka Mangolo.

²⁷ Hape ha Morena a ratile, ha e le thato ea Molimo; ke entse tlhahiso nakoana e fetileng mona, hore ke batla ho bua le lōna ka Litiiso tsa ho qetela tse supileng tsa e . . . tsa Tšenolo. Joale haeba re . . . Nke ke ka qeta Litiiso tseo tsohle monongoaha, hobane ke ho qala khaolong ea 6 ea Tšenolo, ho haola ka—ho haola ka khaolua ea 19, ho qeta Litiiso tseo. Empa tsa pele tse tharō kapa tse 'ne li ka arabjoa bosiung bo le bong, kea kholoa, Tiiso e le 'ngoe e ka khetheloa bosiu.

²⁸ Joale, haeba re utloisia, ho bona moo re emisang hantle Bukeng eo ea Tšenolo, moo Kereke e hapetsoeng Khanyeng. Tse ling tsohle tse setseng tsa eona li sebetsana le ba-Juda, ha se le Kereke ho hang. E sebetsana le sechaba sa mo-Juda. Ka hona re tlameha ho khutla re rotha, ho tsoa Hloibilong ea Kereke, le ho nka . . . Mona re bona se etsahalang mehleng ea Litiiso tseo, le nakong ea Kereke ea ba-Lichaba. Kereke e faletse; le ka sechaba sa Iseraele, e khutlala morao e tšoarana le Iseraele ho tloha mohla e neng e ba tlohela teng, ho fihlela nakong ea joale; le ho khutla ha Messia, moo ba tlang ho amohela Messia.

²⁹ Joale na lea e tšoara? Kereke e nkeloa holimo. Molimo o ile oa sebetsana le Kereke pele, Mengoaha ea Kereke. Re kile ra tšoarana le eona. Ebe moo Kereke e nkeloang Khanyeng. Moea o Halalelang o ntano khutla ho tšoara Iseraele, joalo ka sechaba. Le ho e fihlisa bohole bona, nakong eo Mokete oa Selallo o tsoeletseng, le ho Ba khutlisetsa hape nakong eo ea qetelo. Ke tla hloma letlapa la ka, ke khone ho e taka le ho e ruta, nako ha e fihlide. Morena a ntoor khutla le Monyaluo, 'me Iseraele e a 'mona. 'Me, oh, e tla ba nako e kakang!

³⁰ Joale, pele re ka e hokela ka tšoanelo, thuto e khôlô e khopang baithuti ba thutabomolimo le baruti ba bangata ho theoha le mongoaha, le batho ba Church of Christ le bao ba tlang ho mamela sena, eona, ke Liveke tse Mashome a Supileng tsa Daniele. Re na le . . . Re ka sitoa ho kenella Tšenolo pele re hokela Monyaluo le Iseraele 'moho le Liveke tse Mashome a Supileng tsa Daniele. 'Me mohlomong, ha Molimo o ratile, haeba A ka bua le 'na tsamaong ea nako, ho bua ka tse ling tsa Liveke tse Mashome a Supileng tsena . . . kapa, e seng Liveke tse Mashome a Supileng, empa Litiiso tsa ho qetela tse supileng. Hape Sontaha se tlang, ke tla leka ho nka Daniele Liveke tse Mashome a Supileng, Sontaha se tlang, ha Morena a ratile. 'Me hoo ho tla bula mabala, haeba A ka re etella pele, ho qala ka tse ling. Be, re tla fumana ho tloha moo ho tsoelapele.

³¹ 'Na le Moena Neville re tla sebetsa taba ena 'moho, le ho etsa sohle seo re se khonang molemong oa batho.

³² Joale, ho khutla nako le nako, re rapella bakuli, re thabela ho etsa joalo ka mehla. 'Me mohlomong nka ke etsa hoo kopanong e 'ngoe le e 'ngoe, haeba batho ba kula, ho ba rapella.

³³ Ha ke lakatse ho hlakisa temoho ea mee. Lea bona, joale se hlahileng ke sena joale. Ke lekile. 'Me ke tseba ke entse lintho tse phoso; empa ke lekile ho phela haufi le Molimo ho lekana, ka linako tsohle, nqa ho Molimo, lipono tsena li hlaha joalo, ka tloaelo li hlaha joalo. Esita le batho ba lahleheloaang ke lintho, 'me ba mpitsa, ho nkōpa ho ea rapela Morena, ho botsa moo e leng teng. Joalo ka Jese a kile a lahleheloa ke limulete, eaba bashanyana ba theoha ho bona moporofeta, a ba joetsa hore limulete li se li khutletse hae. Joalo ka mokhoa oo, e lokile ka ho phethahala. Empa e-ba ngata haholo, batho ba bangata haholo... Ha se tikolohong ena feela; ke lefatše ka bophara, lea bona. Ka baka leo e-ba, e ntabola likoto, 'me e u emisa ka litšetšekoane ka linako tsohle, ho fihla moo... .

³⁴ 'Me ke sona se chochileng baena ho qala thuto eo, ho thoe ke ne ke le Morena Jesu Kreste ka nama. 'Me re tseba hoo ho ka tabola Tšebetso likotoana ka bottlalo feela, sa lihela sekhobo holim'a Kreste le ntho eohle. Lea bona? Ka tlameha ho ba khohlopa haholo, ho khaotsa hang, ho ba tsebisa e se ea Molimo, e ne e le ea diabolosi. Lea bona? 'Me ke batho ba lokileng. 'Me taba e supang batho bao ba tsoetsoe ke Moea oa Molimo labobel, hobane, eitse ha ba bone 'Nete ka Lengolo, ba khutletse ho Molimo, ka nèpahalo, lea bona, ka potlako. Ka hona, e supiloe e le Satane ea lekang ho etsa ho hong ka batho; bohle e ne e le batho ba lokileng, ba Bakreste.

³⁵ 'Me e bile bongata bo itse ho 'na, "Moena Branham, joale re u tšepa le ho feta pele."

³⁶ Hoba, le bona seo, ka neo eo Molimo a mphileng eona, nka be ke entse'ng ka eona? Nka lahlela sechaba maotong a ka, kapa, batho. Seo re se bitsang *sechaba*, ha se "kosmos" e ka ntle mona, e leng—e leng libeso tsa kanono le joalo-joalo. Ke bua ka Bakreste, molumeli oa makoma, lebbe la... Ha re bua ka *sechaba*, re rera ka "batho ba tsoetsoeng labobel," ke sona seo re se bolelang, ka sechaba. Ha se mang le mang feela ka ntle mona, ke tšila le sebolu seo re phelang ho sona lefatšeng, hoo feela ke—hoo feela ke lerôle la lefatše le khuttlelang teng. Ke bua ka Bakreste ba tsoetsoeng labobel, batho e leng Bakreste ba makoma.

³⁷ Ke emetse monna ea tla boela a mpharumela mabapi le ho hong. Motho o nketetse nakoana e fetileng, 'me ha thoe, "Ona mohopolo oo, oa Kreste ea tšoelang mathe mobung, ka mathe a Hae, ho luba khoabinyana 'me a nèta mahlo a motho." Ha thoe, "Ke litšila, tse kakang, ho Eèna ho tšoela, ka mathe a Hae a tsoang molomong oa Hae! Bohlasoa bo bokaalo, ho tšoela mobung, ho luba linkhoa tsa seretse a nèta mahlo a monna ka tsona."

Ka re, "Empa o khutlile a bona." Lea bona, ke eona.

³⁸ Athé monna eèna eo! Ba butse litša tsa maponopono pel'a tulo ea ka, lea tseba, letangoana la ho tola. 'Me—'me monna eo o hlophiselitse ngoana e mong le e mong oa hae ho theohela ho ea tola letangoaneng leo. 'Me eèna le mohats'ae ba kena teng, le bona, letangoaneng leo. Le ntšoarele, lõna likhaiseli tsa ka. Empa mono ho tola basali bao, ba batlileng ho ba lekholo, kapa a mabeli, letsatsi ka leng; basali, litšila tseo tsohle le lintho, haholo basali ba sejoale, 'me li sesa metsing ao, litšila tseo le mafilo a kenang melomong ea bona, ba li koenya ba li tšoela. Ke batla mohla a tla mpharumela, lea bona.

³⁹ Ba itse, "Hola—hola Kreste a phela kajeno, ba ka Mo hlahlella bohlasoa bo nyonyehang boo."

⁴⁰ Le ka re'ng ka ntho eo? Kea kholoa le tšoara seo ke se bolelang. Ba lukela hantle letangoaneng leo, 'me bongata ba bona ba tšoeroe ke maloetse, mokaola, mala-a-libe, le ntho eohle esele, hantle ka mono. 'Me ba khaphatsa ka molomo oa bona feela, le ntho eohle joalo, me li phaphametse ka mono joalo. 'Me e lumellana le melao ea bohloeki, ehlile?

⁴¹ Ka hona, oh, banna, letsatsi lena leo re phelang ho lona, moena, khaitseli! Ke nako ea ho Khutla ha Morena! 'Me tšepo ea Kereke e 'ngoe feela, ke ho Khutla ha Morena.

⁴² Be, nke ke ka thibela lintho tseo; ha ho hlokahale. Bibebe e li boletse pele ho fihla mona. Ke sitoa ho li thibela. Empa ke batla kolu ea ka e hatisitsoe khatisong ea Leholidõ, ho thoe nkile ka ema khahlano le eona, mohla Kahloko. Ke ne ke eme khahlano le eona.

⁴³ Ke sa ntse ke lumela Bibebe ena e le Lentsoe la Molimo. Ka hona ha ho letho lefatšeng, khahlano le Lona, le ka Le thibeling. Empa Bibebe ena mona, ena ke 'Nete, lena ke Lentsoe la Molimo. Joale ha re huleng liseile tsa rôna—rôna—rôna, re ankora nakoana lebopong la khotsa la Kou ea Phomolo. 'Me —'me hosane re ka sesisetra nqa e 'ngoe, empá hona joale ha re ankoreng re mamele joale Puo ea Ntata rôna oa Leholidõ ha A buisana le rôna ka Lentsoe la Hae, rea tšepa, kajeno.

⁴⁴ 'Me bosiung bona, joale, hlophisa potsonyana efe ea hao. Joale, haeba e se ntho e tla khopisa motho. Haeba u etsa joalo, joale hoo... Nke ke ka e arabela, le ho qala, lea bona. Empa uena, ntho e itseng, ho re, "Be, joale, haeba ke etsa ntho e itseng, na Molimo o re laela ho etsa sena?" Kapa, lea tseba, lipotsonyana tse pelõng ea hao. Kapa, "Re atetsoe ke lineo har'a rôna, Moena Branham, na re ka li sebelisa ka tsela *ena* kapa ka tsela *eane*? Kapa, re tlameha ho etsa'ng?" Ntho eo nka boelang ka u arabela eona ka Lengolo, lea bona. Ngola nthoana e itseng. Nka thaba. 'Me haeba e le sieo, ke tla qotsa sehlooho sa mofuta, le ho le rerela bosiung bona, ha Morena a ratile. Sena ke Sontaha, 'me esale ke...

⁴⁵ Sontaha se fetileng ke qalile ka etela koana ha Moena Caubble. 'Me ke utloile tleloko ea kereke ena, 'me ka tsoa ke nyolosa ke theosa ka jareteng. Ha kea khona ho e mamella. E ne e le phetho. Ke le utloile, ka hona ka—ka—ka tlameha ho theoha feela.

⁴⁶ Ka hona joale ha re inamiseng lihlooho tsa rōna joale le ho buisana le 'Mopi oa rōna, 'me le ka polelo ea thapelo. O teng ea tšoereng kōpo e ikhethang? Phahamisa matsoho a hao feela, ho re feela, "Ke . . ." E tsebise feela. Molimo o tseba se lutseng pelōng ea hao. Joale u hopole qelo ea hao kelellong ea hao.

⁴⁷ Molimo o Halalehileng ho Fetisa, O bopileng Maholimō le lefatše ka Lentsoe la molomo oa Hao, ka mehopolo ea kelello ea Hao. Re kena ka pel'a Sefahleho sa Hao, ka Jesu Kreste, Morena oa rōna, ho U leboha ka sohle seo U re etselitseng sona. 'Me re motlotlo haholo ho Uena, Morena, hoseng hona, ho tseba moo re emeng teng, ho tseba malulo a rōna hoseng hona, le nalane ea nako, le bokamoso bo tlang ho tla. Ho tseba kajeno, hore ka mohau oa Molimo, re hlatsoitsoe Maling a Kalvari, re hlophositsoe, ka tumelo lipelōng tsa rōna, ho kopana le Eēna hola A ka fihla kajeno. Re tlameha ho re, "Leha ho le joalo, tloo, Morena Jesu."

⁴⁸ 'Me re bona sebe se qhobellana, ho fihlela e ka lefatše le kasakasa tlas'a sebe. Maemo a ho noa le ho mokola, le mekete ea botahoa, le ho tsola, le, oho Molimo, sebolu, le tšila le qhefeqhefe ea batho. Le ka moo bona, hola feela ba ka eelloa, Morena! Na ebe batho bao, ba aparang liaparoana tse khopo tseo tsa khale, ba tsoela seterateng mono, na ha ba lemohe hobane bona ha se letho haese liboko le lerole, mohlomong veke ho tloha joale liboko li tla be li ej a 'mele oo ba o tlotlisang hakana? Na ba eelloa o tla jeo a ke litšoelie li o qete? 'Me moea oa bona o tla ema koana Bosafeleng kantle ho Molimo, kantle ho Kreste, tšepo e le sieo, o teba botšabehong bo nyarosang, ho timeletsoa feela ho Khutleng ha Hae. Oho Molimo, re fe likolu tse—tse lemosang, re tle re lemosa moea o mong le o mong khahlano le kotsi eo ba e habileng.

⁴⁹ E ba le rōna kajeno. Re fe "mantsoe a bohlale," joalo ka Solomone a kile a bolela ho Moeklesia, re tle re be "lihahi tse bohlale," re tle re be "balisa ba phutheho ena." 'Me rea rapela, Morena, ha re batla mantsoe ao re ka a buang, e tle e be—e be mesebetsi e tsoileng-matsoho e tla tšoara pelō e hlokang haholo mona hoseng hona.

⁵⁰ Ha re a tla ho phutheha tlas'a marulelo a chesang ana kajeno, ho bonoa feela, empa koano re tlie hobane re U rata, le hobane re rata ho utloa ho tsoa ho Uena. U Moratuoa oa rōna eo re mo ratang, 'me re lakatsa ho utloa Mantsoe a tsoang ho Uena. Re motlotlo ka seo re seng re se utloile. Se tla lula le rōna halelele.

Joale re fe kabelo U re behetseng eona kajeno, re sa U emela ho ea pejana. Re e kopa ka Lebitso la Jesu, le bakeng sa Hae. Amen.

⁵¹ Joale ke . . . [Khaitseli e mong o bua ka leleme le leng. Moena e mong o a fetolela—Mohl.]

⁵² Re motlotlo ka likhothatso tseña tse tsoang ho Moea, lia re bolella 'me li re lemosa ho beha leihlo Mantsoe ao Moea o Halalelang a ka re bolellang 'ona kajeno. 'Me ha re tsebe seo A re boloketseng sona, empa re tseba A tšoanetse a tla re bolella se seng. E ka ba potso e lutseng kelellong ea hao, A ka tšoha a e bua mono. A ka tšoha a e bua ka Molaetsa hoseng hona. A ka tšoha a e bua tšebeletsong ea bosiu bona. Eēna, kae-kae kajeno, O leka joalo, ka chebeho, ho lemosa motho ho tšoara Mantsoe.

⁵³ Joale ho phetla Lentsoe le ngoliloeng, re fetele koana Bukeng ea Exoda, thutong ea Sekolo sa Sontaha.

⁵⁴ U na le tšebeletso ea kolobetso? [Moena Neville o re, "Che, ha e se ka hora ea botšeleta mantsiboea ana."—Mohl.] Che. Kolobetso ea kolobetso e ka hora ea botšeleta thapama ena.

⁵⁵ Ha re feteleng khaolong ea 17 ea Exoda, le ho qala ka-ka temana ea 5, kea kholoa, litemana 5 le 6 tsa khaolo ea 17 ea Exoda.

*'Me MORENA a re ho Moshe, Tsoela kapele ho sechaba,
'me u tsamaee le baholo ba Iseraele; u nke lere la hao,
lee u otlileng nōka ka lona, letsohong la hau, u ee.*

*Bona, ke tla ema pel'a hao . . . mane lefikeng le Horebe;
'me . . . tla tea lefika, 'me metsi a tla tsoa ho lona,
sechaba se noe. Moshe a etsa joalo pontšeng ea baholo
ba Iseraele.*

⁵⁶ Joale ha nka reella sehlooho sena sa thutoana ea Sekolo sa Sontaha, nka qotsa theron ena ea thuto ea hoseng hona, *Metsi A Ka Mehla A Tsoang Lefikeng*.

⁵⁷ Re tseba esale Iseraele e le mohlala oa nalane ea kereke. Hoba, Iseraele e ne e le batho ba Molimo ho fihlela ba etsoa Egepeta, eaba ba fetoha kereke ea Molimo ka ha ba arohantsoe le lefatše lohle.

⁵⁸ 'Me ha re arohantsoe le lefatše lohle, re fetoha kereke. Empa ha re itharile le lefatše lohle, ha re ka har'a kereke. Joale ke tšepa e hlile e teba, e iphumanela malulo. Lea bona, ha re kereke pele re arohantsoe le lefatše. Ho ikarola, ho tsoa bathong ba sa hloekang, re sa kheme le bona, re sa nke kabelo libeng tsa bona. Se sikareng joko le ba sa lumeleng, le mpe le ikhethe linthong tsa lefatše.

⁵⁹ 'Me mohla Iseraele a leng Egepeta, e ne e le batho ba Molimo. Eaba ba biletsoa ka ntle, kapa ba kena ho exoda, ho tsoa, mohlang oo ba bitsitsoe kereke, hoba ke mohla ba ikarotseng lefatšeng lohle.

⁶⁰ 'Me lona lentsoe *kereke* le bolela "ho biletsoa kantle." *Exoda*, "ho tsoa." E mong le e mong oa rōna, Bakreste, re fumane exoda bophelong ba rōna. Mohla re bitsoang har'a bomphato ba rōna, ho biletsoa kantle ho batho bao e bileng balekane ba rōna, ra fetoha batho basele, ho tsamaea le batho ba fapaneng ba itšoere ka ho fapana ba bua ka ho fapana. E ne e le exoda bophelong ba rōna.

⁶¹ Israele e re taketse mohlala o hlabosang, mohla Molimo o ba biletang ka ntle. Ba kene ho exoda, 'me ba tsoile bathong ba—ba lefatše, ea eba sechaba se khephotsoeng, ho Molimo, batho ba hlollang. Ba tsamaile tlas'a meriti ea setulo sa mohau. Ba phetse 'me ba tsamaile ka Topallo e khōlō ea Mollo. 'Me Molimo o ba ntšitse Egepeta, ho ba isa lefatšeng leo A le tšepisitseng.

⁶² 'Me, ho exoda ena, ba hloaeloa moetapele oa moea, moetapele, e leng Moshe, motlotsua moporofeta e moholo e le—e le monna ea phahameng. E le monna ea lokileng, o tsoetsoe e le monna ea lokileng. Molimo oa 'mitsa a sa le ho 'ma'e, le pele ho tšiu ena; Molimo o mo tlotsitse pele ho motheo oa lefatše, ho beoa moetapele oa moloko oo, ho tlisetsa batho exoda ena.

⁶³ Ha se khale mona, ha ke qoqa le bana mona tabernakeleng, ke ba phethela theronyana; le ho bolela, kapa ho ba tšoantšetsa Jokobeta, ka moo a rapetseng, eēna le Amrame, ntate oa Moshe, ka ho etsa ho hong mabapi le ho loela batho. 'Me Amrame o bone pono ea Molimo o eme, kapa Lengeloi, le supile nqa leboea, le 'molella se tlang ho hlaha. Eaba ho tsoaloa Moshe e monyenyan. 'Me ha ba tšaba melao ea khosi, kapa lithorelo. Ba tsebile Molimo o behile letsoho la Oona holim'a Moshe, 'me ha lula ho le joalo. Ke hantle. Ho sa tsotellehe seo khosi a se buileng, seo lefatše la sepolotiki, seo ntho efe e se buileng, ba tsebile Molimo o beile letsoho la Oona holim'a Moshe. Ha ba ka ba tšaba ho mo lokolla, ho 'mea har'a likoena hantle; athe li ne li nontšitsoe ke bana ba Baheberu, ba ba fepile likoena. 'Me koana Moshe o kentsoe hantle har'a areka a kenngoa har'a likoena, hantle har'a bona. Hobane, ha ba ka ba tšaba letho, ba tsebile Molimo o beile letsoho la Oona holim'a Moshe.

⁶⁴ Be, joale, hola feela re ka tseba hona hoo, hore Moetapele oa rōna e moholo, Moea o Halalelang, Molimo o Mo romile. 'Me Ke Moetapele oa rōna. 'Me ho sa tsotellehe seo lefatše le se buang, le ka moo ba u tšehang le ka moo ba u somang, re setse Moetapele oa rōna morao! Molimo o rometse Moea o Halalelang ho beoa Moetapele oa rōna. Lea bona? "Ho se ho se hokae 'me lefatše ha le sa tla Mpona. Feel a lōna le tla Mpona, hoba Ke tla ba le lōna, le ka ho lōna, ho isa bofelong ba lefatše." Ka hona, Moetapele oa rōna e moholo o na le rōna, Moea o Halalelang. Joale re tšoanelia ho sala Moetapele enoa morao 'me re etsise seo A re laelang sona. 'Me Moetapele enoa a ke ke a re faposa tsela, O tla re baballa hantle tseleng ea Lengolo ka linako tsohle. Empa A ke ke a

khelohela letho le *leng*, le ka lehlakoreng *lena* bakeng sa ho hong. O tla tsepama hantle tseleng ea Mangolo.

⁶⁵ 'Me Moshe o ne a lokele ho kenya Iseraele mocheng, ho e sala morao hantle ho tšela Leoatle le Lefubelu, ho tšela Jordane hantle, ho kena hantle lefatšeng la pallo, hantle ho parola lehoatata. Ha se Moshe ea fapohileng mocha. Ha se Molimo o fapohileng mocha. Ke batho ba tsoileng mocheng, ba pheutseng mathata. Ka hona, ha re nahaneng ka lintho tsena joale. (Ntšoareleng.)

⁶⁶ Moshe, joalo ka moetapele ea tlotsitsoeng. Qetellong, hoba a bontše batho, ka mehlolo le ka meeka, e beng e ka etsoa ke Molimo a inotši, o hlakisitse mehlolo le meeka ena pontšeng ea baholo ba Iseraele, le pontšeng ea Iseraele, ba ba ba kholiseha hoba Moshe enoa ke motlotsuoa enoa ea tla ba holla naheng ena, ho isoa lefatšeng le molemo leo ba le tšepisitsoeng. Eitse ha ba bona lintho tse khōlō tsena tse entsoeng ke Moshe ka lebitso la Molimo, ba ikemisetsa ho mo sala morao. 'Me o ba ntšitse, a ba tšelisa Leoatle le Lefubelu, ba tšela, mobung o omileng. Le leetong la lefeella, le bolelang nako ea liteko.

⁶⁷ Mothaka ea amohelang Kreste joalo ka 'Moloki oa hae, lintho tsohle li marulelong a ntlu. Empa, pele monna enoa a ka kena kolobetsong ea Moea o Halalelang; motho enoa, pele o tšoanelia ho fetisoa mohatong oa khalaletso. O tšoanelia ho fetisoa nakong ea teko bophelong ba hae. Bohle le ne le tlamehe joalo. Ua fetisoa nakong ena ea teko. "Mora e mong le e mong ea tlang ho Molimo, o lauoa pele, ho khalengoa, ho lekoa. 'Me ha re sitoia ho mamella taeo, e supa re se bana ba Molimo; re mpa re le bana ba bonyatsi, bao e seng bana ba Molimo," Bibele e boletse. Empa ha re mamella ho lauoa, ho tseba hobane "lintho tsohle li sebeletsa molemong oa ba ratang Molimo," e tla ba re bara le barali ba Molimo, ke moo A re tiisang ka Moea o Halalelang ho fihlela letsatsi la topollo ea rōna. Lea bona, ke eona tao eo, khatello, ntho eo re fetang ho eona.

'Me Iseraele, e leng papiso ea histori, e ne e tlamehe ho lauoa.

⁶⁸ Joale, mohla ba leng tlase Egепeta, 'me Molimo o romile Moshe. 'Me a otlollla lere, 'me matsetse le linta li hlahile lefatšeng. A le otlollla letsatsing, 'me la nyamela. A le otlollla holim'a metsi, 'me a fetoha mali. Khele, Iseraele o ne a le koana Kanana...koana—koana Goshene, ba inyakaletse feela; letsatsi ha lea ka la nyamela, likotsi ha li a ba otla; khele, ba ne ba inyakaletse feela!

⁶⁹ Ho tšoana le mohla u pholosoang la ho qala. Ntho e 'ngoe le e 'ngoe, linonyana li ne li bina ka ho fapania, 'me mang le mang a le mosa. 'Me, oh, banna, ntho efe le efe e hlabosa feela mohla u nong u lumela! Ebe ho fihla nako ea teko, tao, nako ea khalaletso, u ikhalaletsa hole le lintho tsa lefatše, "ho beella boima bohole bo u tšoasang habobebe feela." Uena, monna,

u ne u tlamehe ho khaotsa ho tsuba ha hao, ho khaotsa ho noa ha hao, ho khaotsa ho ea phaposing ea pool, mekete ea hao ea likarete e sesang bosiu. Lintho tseo tsohle, ua tlameha ho ikhalaletsa ho tsona, ka tumelo Maling a Jesu Kreste. Ho ikhalaletsa! Lōna basali la tlameha ho holisa moriri oa lōna, ho lelefatsa mese ea lōna, le ho itšoara ka ho fapania le mehleng ea lōna. Nako ea khalaletso! Hangata ba kenoa ke manganga ba koeneha; be, eo ha se ngoana oa Molimo, lea bona. Ngoana oa Molimo o sheba Kalvari ka kotloloho, 'me o tseba e etselitsoe molemong oa hae.

⁷⁰ Ka hona lekhatheng la nako eo, ha fihla koeneho e khōlō, Iseraeleng. Mehleng ea nako ena e khōlō ea khatello, batho ba qala ba koeneha, ho tloha nq'a ena ho ea nq'a eane. Meqoqong ea bona, "Be, holane ra itšalla morao tlase Egepeta. Meea ea rōna e tennoe ke bohojana bona." Ka mantsoe a mang, ha nka e hlophisa ho latela histori joale, ke sona seo ba se buileng.

⁷¹ Joale letsatsing la mehla ena, e tla ba, "Oh, Laborarō ka leng bosiu, tšebeletso ea thapelo! Sontaha ka seng hoseng, ho khuttleloa kerekeng! Re utloa'ng? Ntho e le 'ngoe; moreri o a ema o a rera; lifela; ho khutloa hape." Lea bona, u itharile tšebeletsong ea tlameho feela. Ha u morapeli. Morapeli o ea teng ho rapela, ho itlhalosa pel'a Molimo oa hae, ho rorisa Molimo ka molemo oa Hae; Lentsoeng ka leng, o itšoarella ka Lona.

⁷² E itšoanela le kamano ea lerato. Ha u intša le ngoanana hoba u tsebile u tlamehile, kapa u intša le moshanyana, mehleng ea bocha ba hao. "Mama o batla ha ke tsamaea le mothaka enoa, feela ha ke khone ho mo mamella." Ha u khole molemo mohla a ttileng ho u bona. Kapa, litaba li ka ema joalo ka ngoanana nq'a moshanyana, kapa moshanyana ho ngoanana. U tsamaea le eèna, feela o a u tena; mama o batla ha u tsamaea le eèna hobane ke mofuta oa ngoanana ea ratoang ke mama. Lea bona, e a u tena; ho sieo ke kamano ea lerato. Empa ha u tsotelle, ha u batle ho itlhoekisa, ha u batle ho ea 'mona. 'Me ke a . . . Khele, ke ntho e tsabehang. 'Me mohla a u chaketseng, khele, e ka re a ka potlaka, a ea hae.

⁷³ Ho a tšoana leha uena, "Hobane'ng a rera halelele hakana? Ho ka thoeng ka lintho tse ling *tsena* tsohle, le ntho ka 'ngoe?" Lea bona, ha u a kena leratong.

⁷⁴ Empa ha u hlile u itšoarella ka Lentsoe ka leng, joalo ka Moea ha u re lemositse hoseng hona, lea bona, "Ho itšoarella ka Lentsoe ka leng." E ka ba U ne a bua le lōna ka eona. Ho tiisetsa! Ke Bophelo Bosafeleng, Lentsoe le leng le le leng la Molimo. Ke thabo ho ea kerekeng, tlas'a maemo afe. Ho chesa, ho bata, har'a pherekano, leha batho ba ngangisana, ba rora, sohle seo ba se etsang, e sa le thabo ho utloa Lentsoe la Morena. U kene leratong le Kreste mohlang oo, lea bona, u rata ho ea kerekeng.

⁷⁵ “Be, moratuoa, ke mona Sontaha e fihlile hape, kea kholoa re tlameha ho hlapisa bana re theohele mono. Ao, ha e tene lekhale!” Lea bona, ha u a kena leratong.

⁷⁶ Empa ha u hlile u kene leratong, ha u khone ho emela hoseng ha Sontaha, u tlameha feels ho theoha ho ea phutheha le bona tlase mane. ’Me ha re fihla, re tsamaea . . . Batho ba Molimo, ha ba u tene. Khele, bao ke—bao ke baena le likhaiseli. Joalo ka ha ke tloaetse ho bua, “U ba boima joalo ka sirapa ea harese hoseng ho batang.” Ha e—ha e phalle, e momahana ’moho, lea tseba, e khomarelana ka thata. Joale, ke tlhahiso e khohlahetseng eo, empa ke—ke—ke ho leka ho le tsebisa seo ke se bolelang, lea bona. Ho khomarelana ’moho. ’Me ha e eketsa ho hatsela, ba eketsa ho khomarelana ka thata. ’Me le rōna re tlameha ho ba joalo. Ha mohatsela o eketseha . . .

Metsoalle ea lefatše e a tēla,
Ke Mo khomarela ho feta.

⁷⁷ ’Me seo re se ratang, ha re ratana, ha se hobane re le motho ea itseng; empa ke Kreste ea leng ka ho e mong, seo re se ratang, lea bona. Ke Molimo o ahileng bothong ba rōna, oo re mo ratang. Joale re rata ho phutheha ’moho. Re ne re tloaetse ho bina sefela sa khale:

Ho bokoe tlamo e tlamang
Lipelō ka lerato la Bokreste;
Setsoalle sa mohopolo o joalo
Se tšoana le sa Holimō.

Lea bona, setsoalle sa mehopolo e joalo se tšoana le seo sa Holimō.

Pel’ a terone ea Ntate,
Re tšolla thapelo tse chesang;
Tšabo, litšepo, maikemisetso a mang,
Tšeliso tsa rōna le litakatso.

⁷⁸ Lea bona? E, monghali! E mong ha a hlohonolofatsoa, re e thabela bohole. E mong ha a hlonyme, re hlonyme le eēna. Rōna, re batla ho ba ’moho bohole. Joale re tlamehile ho ba joalo.

⁷⁹ Le Iseraele o ne a tlamehile ho ba joalo. Empa e fetoha moroalo, “Oh, bohobe ba khale bo bobebé, bohobe ba Mangeloi! Be, bohojna bona re ka bo tsotella ka’ng? Meea ea rōna e tenoa ke nyee ena! ’Me tsohle li phoso. ’Me—me manna ana a khale a tšolohang bosiu ka bong, khele, re ka mpa ra ja galiki le liki tse tsoang Egepeta.” Lea bona, lipelō tsa bona li ne li sa lokela leeto.

⁸⁰ ’Me ha monna kapa mosali a qala a lumaluma ka ho tsamaea kereke, ba khathala ho tsamaea kereke, ha ba lokela leeto. Ke hantle. Phoso e teng nqa e ’ngoe.

⁸¹ Oh, ha u rata Molimo, u hopola u ea Leholumōng, ’me lōna bohole le tsamaea ’moho!

Ha se le kopano, ha se le thabo,
 Ho tšepa Letsoho la ka mehla;
 Oh, ha se le khotso Morena o haufi,
 Ho tšepa Letsoho la ka mehla.

Ha se le e . . . Re bina lifela tseo.

Re arola masoabi a rōna,
 Re jarelana meroalo;
 Re kollisa likeleli
 Tsa qenelo ho e mong.

Koana ha re kopana,
 Re hlabeja ka hare;
 Feela lipelo li tla teana,
 Re tsepile ho kopana hape ka nako ea merapelo
 e tlang. (E, monghali, ho kopana pelōng!)

⁸² Joale u ntse u itokisetsa leeto, lea bona, u itokiselitse ho kena Lefatšeng la pallo. Linako tsa teko, ke sona setša se kotsi seo; lefeella, linako tsa teko.

⁸³ Iseraele, nakong ea teko ea eona, e qalile ea phehisana khang e loantšana, e tenoa ke bohobe. 'Me ba ne ba batla ho khutlela Egepeta.

⁸⁴ 'Me eaba ba qala ba tletleba ka moetapele oa bona. Oh, ba tšoha hoba a ka ba lahlehisa; ka mora ho ipontša e le moetapele, 'me Molimo o mo pakile e le moetapele. "Be, koana e ka ba re ile ra itšoara bosaoana nakoana. 'Me—'me mohlomong re fapohile, phoso eohle e leotong." Kapa, ntho e kang eo, lea bona. Ba ne ba befetha khahlano le Molimo le khahlano le Moshe, Molimo le moetapele oa Oona.

⁸⁵ Joale ha re fihla sebakeng, ho thoe, "Ha ke tsebe haeba Lentsoe le bolela Sena, kapa che. 'Me ha ke tsebe letho ka Moea o Halalelang; ke batla ke belaela Seo. Ke tseba ba sa etseng joalo." Be, u ka ikela ua ea Egepeta. Lea bona?

⁸⁶ Empa ha u hlile u ikemiselitse ho lula tseleng, ho tiisetsa Moetapele enoa, Moea o Halalelang, tsepama le Lentsoe. 'Me ha u tsepama le Moea, O tla u baballa Lentsoeng. Ke hantle. O tla u tsamaisa hantle mocheng, tselana ea Lentsoe. 'Me u se ke ua O tšaba. O ke ke oa lematsa letho, O tla u thusa feela haeba u lemetse. O mpa o tla folisa mahloko 'ohle, Moea o Halalalelang.

⁸⁷ Joale re fumana, tseleng ena, hoba ba fihle maemong ana, ba fihlile tulong ea Horebe. 'Me H-o-r-e-b-e, Horebe, re ntano fumana . . . Ha re qhaqholleng lebitso leo. Ke hona moo e—e lebitso Horebe le bolelang "nqalo e omileng" kapa "lehoatata."

⁸⁸ 'Me ha re khaola botsoalle ka har'a kereke nq'a e mong, le ho khaola botsoalle le Moea o Halalelang, e re fihlisa nqalong e omileng, lehoatata, ha ho phele letho, tsohle li metse meutloa. Lea bona, e—e lehoatata, lekhalana le meutloa. Na lea tseba ke'ng hoo? Ke lehlaku le bonolo le theko e thata le hlokileng

metsi, le tšopahana ka thata ho fihlela le fetoha tše hlo. 'Me ha u bona motho ea joalo, ekaba moea o thekothata le ka beng le noselitsoe ka tšoanelo, le ka be le fetohile lehlaku le bonojana kapa ho hong. Empa sebakeng sa hoo, le tšopahane le fetohile tše hlo, le qhela ntho eohle feela, lea tseba, ho fumana phoso. Le hloka metsi feela. Ke phetho. Le hloka feela e—e tsoselotso, kapa ho pshatluoa, hlasimolloe tsoang ho Morena. Le tla—le tla tšoasoloha, ha u ka mpa ua le behela metsi.

⁸⁹ Empa, ke hona ba phelang tulong e joalo ba tlameha ho sotloa ke maemo a tulo eo. 'Me bao ba lakatsang ho phela atmosfereng ea mofuta oo, moo sohle e leng ho qhelana le ho pheha khang, le ho ngangisana le ho sututsana joalo, be, u tla phela tlas'a atmosefere eo feela, ke phetho. Empa ha rea tlameha ho phela mono, ha re hloke ho lula mono.

⁹⁰ Joale, Horebe ena e le moo Molimo a tepelelitsoeng ke batho, hobane ba lelera ba fihla nqalong ena 'me joale ba kene maemong ana. 'Me O ba tlisitse hantle tikolohong ea eona, hobane ba hanne ho tsamaea tselaneng. Ba fapohile e—e tsela e khōlō, ho tše lela koano tselaneng e ka thoko. 'Me Molimo oa susumetsoa ho etsa ntho e nyarosang. A... Ea susumetsa Molimo ho laela Moshe ho tšoara lere la kahlolo leo a ahlotseng sechaba ka lona, le ho otla Lefika, ho hlahisa metsi.

⁹¹ Joale, ke thuto e hlabosang mona holane feela re ka e finyella, lea bona. 'Me ka hobane re solophana hakana, re ipofa le lefatše, le lintho, e qositse Molimo ho tšoara likahlolo tsa lefatše oa otla Mora oa Oona ka Sebele ka eona, mane Kalvari, re tle re lokolohe. Na le bona seo ke se bolelang?

⁹² Joale, ho tlisa batho bana metsing a itseng, hoba ba fihle mono, tulo e omileng ena e entsoe Kalvari. 'Me teng Molimo oa bolella Moshe, Oa re, "Nka lere le baholo, o tlohe, 'me Ke tla ema pel'a hao holim'a Lefika." 'Me Lefika lena e ne e le Kreste. 'Me Moshe, ka lona lere leo a lihetseng kahlolo holim'a sechaba sa Iseraele ka lona, o nkile lona lere lena 'me a lihela likahlolo tsa Molimo holim'a Lefika. Lea bona? O nkile libe tsa batho a li beha holim'a lere lena. Etsoe, o ne a tlamehile a be a otlike batho. Sebakeng sa ho otla batho, o otlike Lefika. 'Me Lefika, ka mohlolo oa Molimo, le hlahisitse pholoso, le hlahiselitse batho ba timelang metsi. Le hlahiselitse batho ba shoang bophelo. 'Me ke seo Molimo a se entseng ha o nkile molangoana oa Hae—oa Hae oa kahlolo, libe tsa ka le libe tsa hao oa li thatela lereng lena; athe le ka ba le otlike rōna, empa le otlike Kreste; ho Eēna ho the ho tsoe *metsi*, a lekanyang "Moea," Moea o Halalelang o tsoile ho Eēna, ho re nea Bophelo. Joale re na le Bophelo Bosafeleng. Joale, Lefika leo e ne e le Kreste. Joale re batla ho elelloa.

⁹³ Ke bone botaki bo bongata ba hlalefo ka Lefika lena. Ke bone bo bong bo nyelisang, nakoana e fetileng, moo ho hlongoeng e—e lelikana qhooeng ea leralla. 'Me—"me ho thoe Moshe o otlike

lefika lena, 'me Iseraele a theohetse tlase mono ka lebekerana la tee, ba khakelelitse lerotholi le rothang lefikeng lena. Joale oo ke monahano oa motho feela.

⁹⁴ Empa mohla Lefika lena le hlahisang metsi a Lona, batho ba ne ba tlola limilione tse peli, ho sa baloe lipoho, likamele, le sohle se noeleng libathe tsa metsi ho Lona. E ne e le molapo o phoroselang o tsoang mono!

⁹⁵ Le Kreste ba leka ho mo taka joalo, Moea o Halalelang kajeno. "Ke mafafatsane feela." Lea bona, a lekanang hore u lumele hoba Molimo o teng. Che.

⁹⁶ Ke Metsi a mangata! Davida o itse, "Mohope oa ka oa khaphatseha!" Ke phororo ea Moea o Halalalelang feela.

⁹⁷ Batho ba O tšaba. Batho ba bang ba re, "Be, kea ntšaba nka tloha ka etsa *sena kapa sane*, kapa ha nka tšoha ke keneletse haholo. Nka u bontša ba kileng ba kenella haholo." Empa ha u supe eo ea sa kang a tsamaea bohole bo lekaneng. Lea bona? E, le re'ng ka ba sa kang ba tsamaea bohole bo lekaneng?

⁹⁸ Joale, re fumane batho ba kena nameng, ba tlosa leoto le phoso. 'Me—'me e seng Molimo, empa batho ba fumana... Ka ho hloka boetapele bo botle, le joalo-joalo, ba ba tlositse ka leoto le phoso, 'me ba kene bohlanyeng. 'Me lefatše lohle, liabolosi o a ba supa, "Bonang! Bonang!"

⁹⁹ Be, e reng ke eme hoseng hona 'me ke le supise mashome a atisoang ka limilione a esong ho qale le hona. Le re'ng ka bona? Lea bona, shebang maemo a bona. Shebang mothaka ea kang Eichmann kajeno, ea phahameng ka ho fetisa. Ba re, "Mpentekosta ha a tšepehe 'mè ha ba hlaboloha, ebile ha ba ruteha," le joalo. Shebang Eichmann, e mong oa banna ba rutheileng ka ho fetisa lefatšeng. 'Me o ba bolaile, bana ba limilione tse tšeletseng basali le banna, meeaa e limilione li tšeletseng. Ha le batle ho supa motho ea kang eo.

¹⁰⁰ Empa mothaka ea sa tsebeng ho bala, ha re re, a ka qapolisa lebitso la Bibele ka phoso, 'me, kapa a bue ntho kapa a etse phoso, kapa a oele molatong, lipampiri li batla ho ngola hohle ka eona, 'me ho thoe, "Ha ba tsepahale."

¹⁰¹ Haeba e ke ke ea tšeptjoa, hobaneng ho se joalo ka thuto, lintho tseo bahlalefi ba li tšoereng kajeno? Shebang Adolf Hitler. Shebang maboko a lefatše kajeno. Ba shebeng. Maele a khale a re, "Li ea thoteng li bapile."

¹⁰² Seo u tlamang ke bokhoni, ka Moea o Halalelang, ho arola se lokileng le se phoso, le ho nka se lokileng le se phoso.

¹⁰³ Joale, re fumana Kalvari ena ea bona, 'me metsi a bophelo a phorosela a sitsa batho.

¹⁰⁴ Joale, batho ba bang ba hopotse lipelōng tsa bona le kelellong, e le phetho seo Iseraele a se noeleng, eaba ba belesa likamele 'me ba bofella mekotla ea bona lipereng tsa bona, le

joalo, 'me ba nkile bana ba bona ba kena leetong ba ea tulong e 'ngoe, 'me ba siile Lefika mono, le ntse le rotha. E phoso.

¹⁰⁵ Lefika leo le ba latetse, le metsi ao a ba latetse. Joale ho Bakorinthe ba Pele, khaolo ea 10, kea kholoa, le temana ea 11, le ka e fumana, ho thoe "Lefika leo le setse Iseraele morao." Hohle moo ba ileng ho qala letsatsing leo ho tsoela pele, Lefika le tsamaile le bona, le metsi a ba latetse.

¹⁰⁶ Papiso e khabane hakae, le e—e tsetleli e ntle le ankora ea molumeli kajeno, ea tsebang hoba Lefika leo le kileng la otloa, Metsi ao a kileng a tšoloha Kalvari, a tsamaea le rōna hohle moo re leng teng. Oh, khili! Ha se ho khutlela tulong e itseng, ho thoe, "Be, re hlide re khile Metsi maoba, koana." Re fumana Mesi le kajeno, hantle mona, hobane Lefika leo e ne e le Kreste! 'Me Kreste ke eèna maobane, kajeno, le ka mehla.

¹⁰⁷ Lea bona, Lefika leo le latetse Iseraele. Ha ba ka ba latela Lefika, empa Lefika le ba latetse. Amen. Iseraele ea tsoelapele leetong la eona. Ba ka etsa ho le hong feela, hoo, e le ho tsepama tseleng, ho toba hantle lefatšeng la pallo. 'Me Lefika le metsi li ba latetse.

... *ke Lefika le ba latetseng: . . .*

Bakorinthe ba Pele e le bolella joalo, khaolo ea 10. Ke hantle.

... *Lefika leo e ne e le Kreste.*

¹⁰⁸ Molimo o nkile likahlolo tsa batho oa li beha holim'a Kreste, a Mo otla. Na le lemohile, Lefika le butsoe lepatso, ho qala mohlang oo? Lefika la buloa lepatso, moo Moshe a otileng teng. 'Me Kreste o ne a buloe lepatso, mohla A neng a otloa, "A tetekoa ka baka la makhopo a rōna, 'me re folisitsoe ka metopa ea Hae." Bophelong boo ho tlie Metsi a Bophelo ao re a thabelang hakana kajeno!

¹⁰⁹ Joale, ho ka rua Bophelo bona, hopolang, Bophelo ba Kreste bo sala le Kereke. Alleluia! Oh, hola re ka ankora mehopolo ea rōna mono metsotso e leshome e latelang! Kreste ha a tlohele Kereke. "Ke tla ba le lōna ka mehla eohle, ho isa bofelong ba lefatše." Batho ke bona ba tlohelang Kreste, ha se Kreste ea tlohelang batho. Batho ba Le tlohela, ka ho se lumele ha bona. Ba tlohela Kreste, ha se Kreste ea tlohelang batho.

¹¹⁰ Iseraele e siile molapo oo, ha se molapo o siileng Iseraele. Lea bona? Hoba, Bibele e bua a hlakile ho thoe, "Lefika le metsi li latetse Iseraele." Ho ba latela! Hohle moo ba ileng teng, Le tsamaile le bona, hape.

¹¹¹ Oh, nka rata, hoseng hona, hola nako e re lumella, ho phetla koana khaolong ea 1 ea Joshua, moo A boletseng, "Hohle moo bohato ba maoto a lōna bo tla hata teng, Ke le file lona. Hohle moo u eang teng, Morena Molimo oa hao o na le uena. U se ke ua tšaba motho. Iphe matla! Hohle feela moo u hatang teng, Ke na le uena hantle mono, e ka bang kae." Molimo o ineanya le Joshua!

¹¹² Ke oona Molimo o tsamaeang le Kereke ea Oona hoseng hona. Ha re noeng Selibeng sena koo. Hohle moo u hatang, Molimo o tla ba le uena, ho nosetsa le ho u nea Bophelo. “Ke tla ba le lōna ka mehla, ho isa bofelong ba mongoaha.” Kreste maobane, kajeno, le ka mehla. Melao ea Molimo.

¹¹³ Joale u re, “Hape, Moena Branham, hobane’ng re sa etse lintho tseo re tlamehang ho li etsa? Hobane’ng lineo tsa rōna le lintho tse ka kerekeng li sa khantše ’mala oa eona, moo e tlamehang teng? Hobane’ng kereke ea rōna e sa phahamele pheong e e tšoanetseng?” Batho, mehleng ea teko, ba ngaloha joalo ka Iseraele. Ba hopola Molimo o ba hlobohile.

¹¹⁴ Empa, hopolang, Lefika ha lea tlohela Iseraele. Iseraele o tlohetse Lefika, ea lebala ka Lefika le nang le eona ka mehla. Le ne le teng mono hantle, le tsamaile le bona ho isa bofelong ba tsela. “Le ba latetse.” Le se hole ho qoqa le lona. Le se hole ho utluoa. Kapa, le se hole ho ka bonoa.

¹¹⁵ ‘Me le Kreste o joalo! ’Moho le Kereke kajeno, ha A hole haholo ho bua le eèna. Bang ba lōna le ngalile, le entse ntho e phoso, ’me le lahlehetsoe ke thabo eo, ’me Metsi a hao a omme. O bohole ba ho buisana le uena. O u setse morao. O tseba khato ea hao ka ’ngoe le sohle seo u se etsang. O labalabetse ho utloa u ’Miletsha temeng.

¹¹⁶ ‘Me motsamao o moholo ona oa pentekosta kajeno, Molimo o u emetse ho ’Miletsha temeng. Ha u hole haholo ho buisana le Eèna. Leha re sitiloe, le ho etsa sebe, re Mo neile mekokotlo ea rōna, le—le ho etsa tse neng li sa re tsoanelia, empa koana O na le rōna. Kreste o boletse A tla ba le rōna.

¹¹⁷ Bibele e boletse, “Metsi a latetse bana ba Iseraele.” E ne re ha e lapa, e tsebile hoba metsi a haufi.

¹¹⁸ Joale, lintho tsena li laoloa ke melao. Tsamaiso eohle ea Molimo e hlonngei ho laoloa ke tsamaiso. Joale re tla nka... Ha re emiseng motsotso.

¹¹⁹ Ha re nkeng mohlala oa lefatše. Le phikoloha, lihoreng tse ling le tse ling tse mashopeli-’ne le phethoha ka bottlalo, le phethahetse hona. Hoo, ha re e-so khone, ka mahlale ’ohle a rōna, ho tea tšupanako e bolokang nako e phethahetseng. Hang ka nako, litšupanako tse khabane tseo ba li teileng, nakong ea selemo, li a eketsa kapa li fokotsa metsotsi e mengata. Empa lefatše ha le hlolehe le ka mohla empa le boloka motsotsoana ka ho nèpa. Le phethahetse hoo boramahlale kajeno ba buang, balepi ba linaleli ba ka le joetsa, lilemong tse mahome a mabeli kapa tse mashome a mahlano ho tloha joale, mohla letsatsi le khoeli li tla fapania hantle. Ka nako ha le phethoha phikolohong ea lona ea lihora tse mashopeli-’ne, le likoloha mopotolohong oa lona oa sehla, ha le lahleheloe le ke kotlo ea lona. Alleluia! Le phethahetse, hobane le tsamasioa ke molao oa Molimo.

¹²⁰ Ba tseba hantle feela mohla leqhubu le tla tsoa, ho fihlisa le motsotsong feela, hobane ba tseba nako eo khoeli e honyelang ka eona. 'Me Molimo o hlophisisitse sohle ka molao. 'Me ha khoeli eo e likela, leqhubu leo le hahaba le eona. Ha khoeli eo e hlaha, leqhubu ke lena le boea le eona. 'Me ba tseba hantle feela, ka nako, mohla khoeli eo e tla theoha. Ba ka e ngola holim'a alamanaka ea k'halendara lilemong tse ngata tse tlang, 'me ba ka u joetsa, ho fihla le motsotsong, mohla leqhubu leo le tla qala le bōba. Ehlide, hoba ke kamoo khoeli e tla tsoa kateng, hobane e hlopholotsoe ka bolaoli ba molao oa Molimo.

¹²¹ Nkile ka ema, tsatsi le leng, pel'a Letša la Michigan. 'Me ka ea koana Letšeng la Superior, leetong la ka la Canada, maliba a maholo ao a metsi. 'Me ka ema mono, ka nahana, "Bophara ba mokhamo oa metsihali ana ke limaele tse kae mono!" 'Me hoba ke tšeletšeng... kapa Letša Superior, ke tla kena Michigan, maliba ao a metsi a batla a lekana. Le ho fihla mono, ho tloha Letša Superior ho ea ho Letša Michigan, ho tloha Letša Michigan ho ea ho Letša Ontario, 'me feela... le Huron, le matsa ao 'ohle 'moho. Ke mothamo oa libarele tse libillione atisa ka libillione atisa ka libilione, tsa metsi a macha a bongata bo sa baloeng a momiloeng ke letša leo!

¹²² 'Me koana Nevada, le koana Arizona, New Mexico, California Bochabela, ho rapame liakere tsa mobu o libataolo, o cheleng. O nonneng hakana, holane metsi ao a ka nela mobu oo, sechaba sena se ka fepa lefatše, ho sa fumanoe batho ba lapileng, re sale ka phaello eo re ka e lahlelang leoatleng. Ke hantle! Limilione tsa liakere tse ka hlahisang litone tse atisoang ka limilione tsa litono tsa litapole le k'habeshe, le linaoa le—le lethusi, le lirapa le liralishe le seleri, le likomkomere, le eng hape. Mobu oo o ka melisa hoo, o—o nyoretsoe metsi feela.

¹²³ 'Me metsi ke ana holimo *mona*, le mobu ke ona o tlase *mona*. Joale re ka a bona, 'me rea tseba a ka etsa joalo, re ka a hlahloba ra a fumana a le macha, ra hlahloba mobu ra o fumana o nonne. Joale, ho futha ha litabatabelo tsohle tsa rōna, ho ke ke ha li kopanya 'moho. Empa, molao o teng, 'me molao oo ke khoheli. Joale, ha re ka sala molao oa khoheli morao, re ka nosetsa karoloana e 'ngoe le e 'ngoe ea naha eo, ra monya metsi ao matšeng ra e nosetsa. Empa re tlameha ho sebetsa ka molao oa khoheli. Re ke ke ra a lakaletsa ho tsoa a kena ka ntle mono. Re ke ke ra a hoeletsa ra a hotolla mono. Re ke ke ra a hlabela litlatse ra a ntša mono. Re tlameha ho sebetsa ka melao ea khoheli, ho a fihlisa mono. Molimo o beetse eng le eng molao.

¹²⁴ Mona, ke ne ke nahanne, ha ke tsebe haeba nkile ka le bolella sena, kapa che. Ke ne ke theohetse Kentucky, ho tsoma sehlora, le Moena Wood, nako e batlileng ho ba selemo e fetileng. 'Me rōna... Sehlora e batla e le leqeme, eaba re ea lapeng la mothaka e mong, ho botsa mabapi le ho tsoma. Monna eo a ruile liakere tse 'maloa tsa mobu, 'me mobung ona ho fumanoa moru o opaneng.

Empa Moena Wood a mpolela, ho re, "Monna eo ke mohanyetsi. Ke—ke mosalumele." A re o a mo tseba, eaba o... kapa ntatae o ne a mo tseba, a tla ea mo kōpa ho lumelloa ho tsoma.

¹²⁵ Ra qhoba re nyolohela tulong ea nkekka ena. 'Me eèna le monna e mong, ba nanarela lilemong tsa bomashome a supileng ba babeli, ba lutse tlas'a sefate sa apole. 'Me Mongh. Wood a atamela monna enoa, a re ho eèna, "Na nka lumelloa ho tsoma nakoana setšeng sa hao?" 'Me a re, "Be," a re, "ho lokile." A re, "Athe uena u Wood ofe? Na u mora oa Jim Wood?"

A re, "Ke eèna."

¹²⁶ A re, "Be, motsofe Jim o ne a tsepahala, le joalo." A re, "U ka tsoma hohle moo u batlang, tulong ea ka. Ke kasakasa makholo a makana a liakere mona, ithuse ka moo u ratang. Theooha u kene malimong ao, hohle moo u batlang. Iktutloe u le hae feela."

¹²⁷ Ka sala ke lutse ka koloing, ka hopola moreri le mohanyetsi ba ke ke ba okhelana mollo, haeba a tla kōpa mohau mahlong a mohanyetsi.

¹²⁸ Ka mora nakoana, Moena Wood a re, "Be, joale, na moruti oa ka a mphelihetsa? Kea kholoa ho ka itokela ha a ka tla."

¹²⁹ 'Monna enoa oa motsofe a iphikolosa a ithusa ka molamung oa hae, 'me a re, "Wood, u re u oele hakaalo, ebole u tlameha ho ineanya le moruti hohle moo u eang?"

¹³⁰ 'Me ka hona, ka nahana, ka morao ho moo, molemo e ka ba ho tsoa koloing. Ka tsoa koloing, ho qoqa le motsofe eo metsotsotso e 'maloa. 'Me a hla a potlaka ho mpolella a sa khemisane le bareri hakaalo, ka ha a hopola ba bua ka seo ba sa tsebeng letho ka sona.

¹³¹ A re, "Ba inanatha ka ntho eo ba sa e tsebeng. Be," a rialo, "monna ha a bua le 'na, ke batla a tsebe seo a buang ka sona." Joale, eo ke kelello e ntle. Ke kelello e ntle. A re, "Joale, monna ha a bua le 'na, ha ke batle ha a bua ka ntho e itseng ese, ea bobare, kakanyo eo a sa tsebeng letho ka eona. Ke batla a bue ka ntho eo a tsebeng seo a buang ka sona." Be, ka hlompha taba eo. Ka hlompha taba eo ka ho motsofe eo oa monna.

¹³² 'Me ka re, "Be, ehlile, motho mang le mang a ka fupa monahano oa boithatelo ba hae."

¹³³ 'Me a re, "Ho kile ha fihla moreri naheng ena, lilemong tse 'maloa tse fetileng, a tsoere tsebeletso koana Acton." 'Me a re, "Moreri enoa, bosiu bo bong, e leng molata naheng ena, a bolella e—e leleiti le lutseng har'a letsoe, 'U noketse sakatuku pokothong ea hao. 'Me u Mof. *Sekete-le-sekete*. 'Me khaitseli ea hao e kulang e ka nqane ho leralla mona. Lebitso la hae ke *Sekete-le-sekete*. O ntse a eshoa, o jeoa ke mofetše maleng a hae.' Le ho re, 'Nka sakatuku ena u e behe holim'a khaitseli ea hao, 'me u 'molelle, "HO RIALO MORENA, a ke ke a shoa, o mpa a tla phela."'"

¹³⁴ A re, “Mosali enoa e ne e le motsoalle oa rōna.” Le ho re, “Re nkile mosali enoa . . . Sakatuku sena; kapa monna enoa, ra se isa mothong enoa.” Pele o itse, “Mosali enoa, ’na le mohatsa ka re ne re tsohelle mono hoseng ’me ra kuka, ra emela mosali enoa. ’Me a le mobe haholo! Lingaka li mo tetse, khale koana. A le mobe hona ra tlameha ho mo jara ka masela a hae, ho mo phahamisa re ’meha thuaneng, le ho mo khutlisa. Ho mo phethola ka lesela la hae, a le mobe haholo.” A re, “Bosiu bo bong, koana, ha hlaha lerata ea ka ba shoetsoe ke motho.”

¹³⁵ E ne e le Ben mane, a tšoere sakatuku eo, a e isa koo. Kea kholoa e ne e le uena, ha ho joalo, Ben? [Moena Ben o re, “Amen. Amen.”—Mohl.] E ne e le Moena Ben mane, o ne a nkile sakatuku seo, hoba e le eēna ea isitseng mosali eo mono.

¹³⁶ Le ho re, “Hoseng ho hlahlamang, ke ha a ej a liphae tse halikiloeng tsa apole.” Le ho re, “Ha a etse mesebetsi ea hae feela, o mpa a etsa le mosebetsi oa moahisane. O hlile o phetse bo!” A re, “Joale ke ipotsitse khafetsa. Ha nka bona moreri eo le ka mohla, o ne a tseba seo a buang ka sona,” ho re, “nka—nka rata ho qoqa le eēna.”

¹³⁷ Moena Wood a sheba ka ho ’na, le ’na ka mo sheba. Ke eme mono, ke khenathetse, ka mofufutso le tšila, esale re hlomme liahelo merung, ’me—’me maqapha a mali a sehlora a re manne hohle. ’Me eaba ke re, “Be,” ka re, “ke . . . Hantle-ntle u re u ka bua le mothaka enoa ’me u tla u joetsa ka moo a khonneng taba eo?”

A re, “E, monghali, ehlile ke riatszo.”

Ka re, “Be, eo—eo ke ntho e ntle.”

¹³⁸ Ke ntse ke ja e ’ngoe ea liapole tsa hae. Li se li ntse li jeoa ke chebere mono, lea tseba, sehleng seo sa selemo, ka Phato. Eaba ke tšoere apole e nyenyane ena, ’me ke e jele. ’Me ka re, “Apole eo e ehlile e a hlabosa.” Ka re, “Sefate seo se eme lebaka le le kae mono?”

¹³⁹ “Oh,” a re, “Ke lemme sefate seo mono, lilemong tse mashome a mararo kapa tse mashome a mane tse fetileng, kapa ntho e kang eo.”

¹⁴⁰ “E, monghali.” Ka re, “Ke batla ho u botsa potso.” Ka re, “Ho tla joang le ka mohla . . . Ke bona liapole tseo li oe le sefateng seo, le mahlaku a sona a foforeha, koana mona esale mahareng a Phato feela.” ’Me ka re, “Ha re e-so hahloe le ke moeana o pholileng feela, ha re eso neloe le ke serame feela kapa letho, ’me koana mahlaku ao a foforeha sefateng seo. Lebaka le lefe?”

A re, “Lero le falletse sefateng.”

“Oh,” ka re, “le ile kae?”

A re, “Le kene tlase metsong.”

’Me ka re, “Le tla lula nako e kae mono?”

A re, "Ho fihlela selemo."

¹⁴¹ 'Me ka re, "Le tla boela le nyoloha, le hlahisa mahlaku a macha a moriti, liapole tse ncha tse jeoang."

A re, "Ke hantle. Ke hantle haholo."

¹⁴² Ka re, "Be, ke batla ho u botsa taba, monghali. U bua ka mathaka ana a sa tsebeng seo ba buang ka sona." Ka re, "U ka ntłhalosetsa Bohlale bo bolellang lero leo ho falla sefateng seo? Holane la lula mono mariha 'ohle, sefate se ka shoa. Sefate sa hao se ka shoa. Kokoana ea bophelo e setsing sa lero leo." Ka hona ka re, "E ka bolaea sefate. Ke Bohlale bofe bo fallisang lero bo le ntša sefateng seo, ho theohela metsong, ho boba ho fihlela sehla sa selemo, bo ntoo nyoloha hape ho hlahisa liapole tse ling?" Ka re, "Beha nkho ea metsi holim'a palo, 'me u bone haeba, ka Phato, a tla theoha ka palo a boele a khutle sehleng sa selemo. Ua bona?" Ka re, "Molao o teng, molao oa tlhaho o teng. Bohlale bo itseng bo hlomme molao ona. Ha se ho fela, empa bona Bohlale boo bo tlameha ho sebelisa molao oo, ho le potlakisetra motsong oa sefate, le ho khutla."

A re, "Ha ke eso nahane ntho eo."

¹⁴³ Ka re, "Na u ka . . . Ha u ka sibolla Bohlale bo fallisang lero bo le thota makaleng a sefate, ho le theolela metsong le ntano khutla, ke bona Bohlale bo mpoleletseng taba ena koo bosius boo, 'Tloha, beha sakatuku seo holim'a mosali.'"

A re, "Athe ke uena moreri eo?"

Ka re, "E, monghali, ke hantle."

¹⁴⁴ Ngoahola ke ne ke etile (o se a iketse), mohla mohlolohali oa hae a lutseng mathuleng, a ebola liapole, tse tsoang sefateng sona seo. Moena . . . Pele ba ne ba batlile ho re leleka, ba sa re tsebe. 'Me ka tloha ka 'molella ka eona, hore re lumelatsoe ke eëna. Ho e phetha, ho re, "O pakile Kreste ka bottlalo pele a eshoa."

¹⁴⁵ Lea bona, sefate seo se etsisoa ke'ng joalo, ke Bohlale bofe bo le potlakisetra tlase? Ke molao. Ke molao o beiloeng ke Molimo. 'Me molao oo oa Molimo ke ona molao o tlang ho hlokomela ea ipehang tlas'a bolaoli ba ona. Amen.

¹⁴⁶ Lea tseba, ha ke tsotelle na u ka hloliea hakae, ua re—ua re joale, "Ha le ka ke la khona, letsatsi ha le sa tla chaba lehlabula lena." Le tla chaba, le ha ho le joalo. U ka bua ha kae ua re, "Nke—nke—nke ka lumella bosiu ho tšoara." Bo tla tšoara, leha ho le joalo. Hobane selo seo re phelang holim'a sona, se bitsoang lefatše, se laoloa ke molao oa Molimo.

¹⁴⁷ Joale, baena le likhaiselsi, ke batla ho le botsa taba. Ka hona, haeba re tsoetsoe bocha ke Moea oa Molimo! Molimo ha o na likaroloana tse fokolang le likarolohali tse matla, Ke Molimo o sekolokoto! 'Me haeba Molimo o lekaneng o ahile ka ho uena, E batla e le seriti feela, matla ao a lekane ho bopa lefatše le lecha. Matla ao a lekane ho bopa khoeli e ncha le tsamaiso e ncha. Ke

Molimo, 'me e matla! 'Me hantle hona joale molumeli e mong le e mong ka mona ea ruileng Bophelo Bosafeleng, hoo ke, Moea oa Molimo o ahileng ka ho uena; ke Matla a lekanang ho tsosa bafu, a tlāng ho folisa bakuli, a ka hlophisang phikolohoe eo ka bolaoli. Empa uena, a laoloa ke molao, Moea oo o ahileng ka ho uena. Le bara le barali ba Molimo. Moea o ka ho uena, o tla u tsosa letsatsing la tsoho.

¹⁴⁸ Jesu, mohla A na a le mona lefatšeng, mohla A na a eshoa, soule ea Hae e theohetse Liheleng, "Le ho ea rerela meeaa e teronkong, lisoule tse teronkong, tse sa bakang mamellong ea litšiu tsa Nohe." 'Mele oa Hae o ile lebitleng. Empa pele A eshoa, O nehetse Moea oa Hae matsohong a Molimo. Moea oa Hae o ile ho Molimo; soule ea Hae e ile Liheleng; 'me 'mele oa Hae o ile lebitleng. 'Me eaba Jesu o koalooa tsoho ho fihlela Lengolo le ka phethisoa. A ke ke a khutla, ka hobane A ne a tlamehile ho lula lebitleng matsatsi a mararo le masiu. Empa mohla Lengolo lohle le ne le tlatsoa, lerako lena le felisitsoe; Moea oa Hae o theohetse ho soule ea Hae, soule ea Hae ho 'mele oa Hae, 'me A tsoha hape.

¹⁴⁹ 'Me mohla re shoang, lisoule tsa rōna li tla kena tlas'a aletare ea Molimo; moo ke filoeng monyetla oa ho bona, mesong e 'maloa e fetileng, ka moo le lōna le tsebang, ponong, etsoe Bibeleng e bua ka eona. "Meea ea rōna e khutlela ho Molimo O neaneng ka eona, 'me mebele ea rōna e tla khutlela leroleng." Empa tsatsi le leng, mohla Lengolo le tlatsoang, meeaa ea rōna e tla lokolloa ho Molimo, e tla thonaka soule, 'me soule e tla ea ho 'mele. 'Me Matla a tlāng ho re tsosa, a ahile ka ho rōna hona joale! Hona joale re libakeng tsa Maholimō. Hona joale re kene Matleng a tsoho.

¹⁵⁰ Holane molao o le sieo mono, bara le barali ba Molimo ba ka ipopela lefatše ka ntle mono 'me ba iphelela bophelo ba poraefete holim'a lōna. U ruile ka ho uena Matla ao. Haeba u e na le seriti sa Matla a Molimo ka ho uena, u ruile Matla ho etsa hoo. Molimo o matlachole. Na le bona seo ke se bolela'ng? Matla a ahileng ka ho uena a tla etsa hoo. U ka bopa lefatše ka puo 'me ua iphelela holim'a lona. Alleluja! Ke moo.

¹⁵¹ Ke Matla a ka har'a Kereke joale, empa a laoloa ke molao. 'Me molao oo ha se ho "boloka sehlopha sa melao." Ke molao oa tumelo. Jesu o itse, "Tsohle li ka etsetsoa ba lumelang." 'Me holane u ka e lumela, sohle seo Molimo a ka tataisang moea oa hao ho se lumela, ke sa hao. Hohle moo bohato ba maoto a hao bo ka hatang teng, ka tumelo, Molimo o u nea bona. Amen! Ke ba hao, ke lefa la hao, haeba u ka fumana senotlolo sa molao ona oa tumelo se u bulelang eona. Na le bona seo ke se bolelang? Matla ao a laoloa ke . . . Haeba u le mora oa Molimo, u le morali oa Molimo, ntho eo ha e tlohe ho uena le ka mohla. E lutse le uena ka linako tsohle. Empa, tumelo ea hao ke eona e suthang ho Eona, feela E sa ntse e le teng mono. Alleluia!

¹⁵² Ha u pholosoa, Molimo o u nea tumelo ho tsoha tšileng ea lefatše. Tumelo ea hao e hlola lintho tsa lefatše. Tumelo ea hao ke'ng? Tumelo ea hao nthong eo Molimo a e entseng ka ho uena, ho u etsa mora oa Molimo. U tlohetse leshano la hao, u tetse ho utsoa ha hao, u tetse ho noa ha hao, hobane tumelo ea hao e u phahamisetsa holim'a eona. Amen. Haeba u sa etse joalo, ha u na tumelo ea letho. "Me u bolokehile ka tumelo, ka mohau."

¹⁵³ Bokaalo ba tumelo eo u e lokollang, ke bokaalo ba Matla ao u ka bang le 'ona, hobane ka ho uena ho ahile Matla a ho bopa Maholimō le lefatše. Molimo o ahile ka ho uena, 'me le bara le barali ba Molimo. Amen! Ke moo. Empa, ke tumelo ea hao. Jesu o itse, "Kamoo u lumelang, u etsetsoe joalo. Ha u ka lumela, tsohle li ka etsoa. Kannete, ke re ho lōna, ha le ka re ho thaba ena, 'Koqoha,' 'me u sa belaele, u mpa u lumela seo u se boletseng."

¹⁵⁴ Re tlameha ho fetoha batho, ba mofuta mong, ka ho ba le tumelo ho Kreste e moholo enoa ea lopollang ea phelang ka ho rōna, Lefika lena le otlioloeng le sa hlobobheng Kereke le ka mohla? "Ke na le lōna ka mehla eohle, ho isa bofelong ba lefatše," Boteng bo sa khaotseng ba phororo e khōlō ea Kereke le Matla a tšolohileng Kalvari a kenang ka ho Kereke, Boteng bo sa khaotseng ba Molimo o phelang, mophula o moholo o phallang, Lefika le teiloeng le re feheletsang leetong la rōna.

¹⁵⁵ Iseraele ea na ea lahleheloa ke tumelo ea eona. Ba na ba fapoha tsela. Ba qalile ba lakatsa lipitsa tsa nama. Holane ba boloka tumelo, ba lumela ho Molimo o nong o tla ba isa lefatšeng, ba ne ba sa t'l'o khathatsoa ke letho. Ba se ba phetlile maoatle, ba se ba otlide lira tsa bona ka likotlo, ba thakhisitse lira tsa bona ka mora bona, 'me ba kene koana lefatšeng, 'me le joale ba haelloa ke tumelo ho kena tšepisong.

¹⁵⁶ Joshua le Kalebe ba bile le tumelo eo! Ba itse, "Re khona ka ho fetisa ho fekisa sohle se re etang kapele."

¹⁵⁷ Ke bona bothata ba kereke. Re ka hlola maloetse 'ohle. Re na le Matla ka ho rōna. Re bara le barali ba Molimo, ha ho letho le ka emang pel'a rōna. Ntho e le 'ngoe, O batla ho fumana motho ea e lumelang, ea tlang ho lumela seo Molimo o seng o le etselitse sona. Ha se hona re tla ba joalo; re se re le joalo hona joale! 'Me Boteng bo sa timeng ba Moea bo tsamaea le rōna. Amen! Ke moo.

¹⁵⁸ Ke sona seo ke se bolelang ha ke ne ke bua ka temana eo hoseng hona, *Metsi A Ka Mehla A Tsoang Lefikeng*. Metsi a ka mehla a tsoang Lefikeng a teng mona hantle hona joale, Metsi a o ka mehla a tsoang Lefikeng leo le teiloeng Kalvari. Mohla Moea o Halalelang oo o nong o tsoa ho Eēna holim'a Kalvari, oona o khutletseng holim'a Kereke ka Letsatsi la Pentekosta, esale oona Moea o Halalelang o leng teng hoseng hona. 'Me O re fa tšepiso!

¹⁵⁹ Ke lona lebaka, ho tsamaea ka pel'a batho ba kulang, mohla A neng a nthoma koana, kea e lumela; Molimo o itsalo! Lipono li hlaha joalo; Molimo o e tšepisitse! Molimo a ke ke a bua leshano.

¹⁶⁰ E lumeleng! U tlameha ho e lumela. Ntho e tlameha ho ba teng mono, ho bula mokoallo, ho bula ntho eo ho u lumella ho kena ho eona. Seo re se hlokang kajeno ha se ho rapella Matla a mangata. Le ruile Matla a lekaneng ho bopa lefatše le lecha. Seo u se hlokang ke tumelo ea ho sebelisa Matla ao. Seo u se hlokang ke ho laola bophelo boo, le ho phela bophelo bo lokileng hakana, hoo ha u kópa Molimo eng le eng, u a tseba! Re na le tšepo ho Molimo, ea seo. Rea tseba, hoba ha re boloka Melao ea Oona, O ke ke oa re hanela letho le molemo, haeba re tsamaea le Oona. Molimo o tsamaeang le rōna. Oh, banna!

¹⁶¹ Ba ne ba tlameha ho etsa ho le hong. Ba ne ba tlameha ho etsa ho le hong, hoo, ke ho tsepama tseleng ka kotlolohlo. Ha se ho lelera *mona*, le ho lelera *mane*; empa ho tiisetsa tseleng! Kereke e tlameha ho etsa ntho e le 'ngoe, ho tiisetsa tseleng! Ba e-na le Topallo ea Mollo, bao, ba tlameha ho tiisetsa tseleng ka ho sala Topallo ea Mollo morao. Ke eona e ba tsamaisitseng. Ba bone kholiso eo ea bona, Topallo eo ea Mollo. Ba E bone e sebetsa ka Moshe, 'me ba mo tsebile e le moetapele.

¹⁶² Kajeno re na le Lentsoe. Re latetse Lentsoe. 'Me re bona Lentsoe le sebetsang ka ho balumeli, 'me re e tseba e le joalo, ke hona. Molimo o sebetsa le rōna, ho thasisetsa Lentsoe ka mehlolo e latetseng! Re tiisetsa Lentsoe. Lentsoe le hlahisa liphetho.

¹⁶³ Ba tiisesa Moshe. Hobane, Topallo ea Mollo, Moshe o ne a latetse Hoo. 'Me ba ile ba latela. Ha ba qala ba rorela Moshe, ba ngangisa Molimo khahlano le Moshe, ba lelera ka mona le ka nqa e 'ngoe. Mathata a kena. Ehlide.

¹⁶⁴ Re tiisetsa Lentsoe, 'me Lentsoe le hlahisa lipontšo. Jesu o itse, "Mehlolo ena e tla tsamaea le ba lumelang Lentsoe." Lea bona, e lula le... U lule le Lentsoe, Lentsoe le hlahisa lipontšo. Empa, Moshe, o entse'ng?

¹⁶⁵ Ba ile ba lelera, 'me ba entse'ng? Ba lelera ba fapoha tsela, 'me ba lahleheloa ke mohloli oa metsi a bona.

¹⁶⁶ Ke hopola e le seo kereke e se entseng kajeno. E fapohile tsela ea Lengolo. Ba khelohetse mekheng. Ba khelohile ba kenela linthoana tseo ba sa lokelang ho li etsa. Ba hlomme lintho. Ba hlomme lintho tse joalo ka Tumelo ea Baapostola. Le e fumana kae ka Bibeleng? Ba amohetse likatekisima tseo ba li balang. Ba amohetse mekha ea bolumei litulong tsa boiphihlelo. Ba amohetse ho tsukutla matsoho litulong tsa tsoalo ea bobeli. Ba amohetse hofafatsa litulong tsa kolobetso ea mesi. Ba amohetse sebopheho sa bokhopo, "Ntate, Mora, le Moea o Halalelang," athe ntho e joalo ha e fumanoe ka Bibeleng. Bibebe e itse, "Ka Lebitso la Jesu Kreste!" U ka etsa ho le hong feela ha u batla Metsi ao, khutlela tseleng hape. Hloella hape holima... Ha A eso tlohe; O sa le teng. U nka litumeloana tsa hao litulong tsa Kreste. U horometseha u kenela bohlaha bo mafito.

¹⁶⁷ E mong o itse, “Be, ’na ke Methodise.” E mong o re, “”Na ke Baptise.” Taba eo e u supa u se Mokreste, ke hona. Re ba Kreste! Re ba Hae. U re, “Be, haeba, ke le Baptise.” Ha e le phetho seo u leng sona, ha u oa Kreste, u Baptise. U re, “Be, ’na ke Pentekosta.” Haeba u le Pentekosta ka mokha oa bolumeli, ke phetho seo u leng sona.

¹⁶⁸ Empa, ha u ruile boitsebelo ba pentekosta! ’Me Lentsoe la pentekosta le tla hlahisa boiphihlelo ba pentekosta! Ho latela seo baapostola bao ba se latetseng, ho lula hantle mono ho fihlela u tlatsoa ka Moea o Halalelang.

¹⁶⁹ ’Me ha u ema khahlano le Lentsoe, moea o ka ho uena o tsamaea khahlano le seo Lentsoe le se buang, e tla ba ha se Moea o Halalelang. Ke liabolosi ea lekisang Moea o Halalelang. Na le bona seo re se kenetseng? Oh, bang ba rōna ba buile ka lipuo, re patlohile ka sethoathoa sa ho hlaba litlase le lilo tseo, ra ntano latola lintho tse ling tsena tsohle. Re lumelletse tsohle tse seng Lengolo ho kena kerekeng. Kajeno re honyeletse kae? Re khutletse lehoatateng le leng, mokhatlo o omeletseng. Re hlophisitse, ’me re lahlehetsoe ke Metsi a rōna. Ke sona se entsoeng ke Pentekosta hantle. Ha e qala e hlophisa, e qala e pshatla botsoalle, ’me ho thoe, “Be, joale re ke ke ra sebetsa ‘moho, haeba mothaka enoa a lumela seo.”

¹⁷⁰ Tsoela pele, lula le eèna ho fihlela a finyella Lentsoe la ’Nete, tsebo ea ’Nete. E ka bang eng, e tlohele, leha ho le joalo. Tsoelang pele feela, le be baena.

¹⁷¹ Empa, oh, ra tlameha ho hlophisa, le ho re, “Be, hobane u se Bonngoe, hobane u se Bobeli, kapa Borarō, kapa ka tsela ena, re ke ke ra amana le uena.” Ha re etsa joalo, re etsa’ng? Re ikhutlisetsa lehoatateng hape. Ke hantle!

¹⁷² Empa, hopolang, mohla Iseraele a ne a lelera a fapoha tsela, tsela ea lefatše la pallo, Lefika ha le a ka la ba tlohela; Le ile la lula mono hantle, le metsi a entse joalo. Le Moea o Halaleang o joalo, o lutse hantle mona. Ha rea tlameha ho khutla re ntse lelera.

¹⁷³ Joale, mona Molimo o re ruta ntho e khōlō. Molimo mona o re ruta thuto. Kreste o otliroe hang, ho re fa boiphihlelo ba pentekosta, hang, kamehla. Joale, mohla Lefika leo le neng le otloa, Le ne le sa tlameha ho otloa hape. Le otliroe hang feela.

¹⁷⁴ Moshe o sitiloe ka ho Le otla labobeli, taba e supang khaello ea tumelo ea hae nqa Pheko. Empa Kreste ha a se a otliroe hang, re tseba A sa tlameha ho otloa hape. Be, ebe Moshe o ne a etsa’ng? Moshe o ne a hloma ntho e ’ngoe e ncha, ho leka ho etsa ntho e ncha.

¹⁷⁵ ’Me le tšebetso ea rōna ea bolisa e entse hoo kajeno. Ba lekile ho etsa ntho e ncha. “Re tla iketsa Assemblies of God. Re tla iketsa Pentecostal Church of God. Re tla ipopa General Council.

Re tla iketsa *sena, sane*, kapa se *seng*.” Ha se seo Molimo o se entseng. E ne e se mohopolo oa Hae oo.

¹⁷⁶ Kreste o otliroe hang. Ke bona boiphihlelo ba mantlha. Ke eona tsela ea mantlha. Ka Letsatsi la Pentekosta, Petrose o itse, “Bakang, e mong le e mong oa lōna, le kolobeletsoe la Lebitso la Jesu Kreste.”

¹⁷⁷ “Refafatsa ka lebitso la ‘Ntate, Mora, Moea o Halalelang,’ ho neana litumeloana tsa mefuta eohle le ntho eohle ka Eona.” Ha re fapoha Lentsoe, ha re makale re sa fihle kae feela. Lea bona?

¹⁷⁸ Molimo o re ruta thuto. Moshe o ne a sa tlameha ho re, “Joale re tla qala ntho e ncha mona joale, ‘me re tla hlophisa re bope kereke ea Katolike.’” Ke ntho ea pele eo ba e entseng. Che, eaba ka mora nakoana, “Be, re tla qala ntho e ncha ho tsoa mono, re tla bopa Lutherane.” Eaba ho latela Anglican, ea ntano ba Baptise, le eng hape, le ma-Campbellaete, le Church of Christ, le antikreste, le lintho tse ling tsohle. Lea bona, bohle ba qalile ba thakhoha, e ‘ngoe ka mora e ‘ngoe, e ‘ngoe ka mora e ‘ngoe, ho bopa mekha ea bolumeli le mekhatalo. E ne e se eona. Na le bona seo ba se etsang mono? Ba otla Lefika hape, ho qala ntho e itseng e ncha. Ha re hloke thuto e ncha.

¹⁷⁹ Motho ofe ea kileng a kolobetsoa ka Bibeleng o kolobelitsoe ka Lebitso la Jesu Kreste. Motho mang le mang ka har’ a Bibele ea fumaneng Moea o Halalelang, o tla ka tsela ea Molimo, hantle ka moo Molimo o e rerileng ho phethisoa. Ba entse hona hoo. Ba fumane boiphihlelo bo tsoanang. Ba latetsoe ke lipontšo tse tsoanang. Ba latetsoe ke mesebetsi e tsoanang. Hobane’ng? Ba phetse ka Lefika. Ba fumane Metsi a tsoanang.

¹⁸⁰ ‘Me, kajeno, lebaka leo re nang le litumeloana tse ngata hakaale le mekha ea malumeli, ka hobane re qala ntho e ncha. Ha re hloke letho le lecha. Khutlela morao!

¹⁸¹ Moshe o ne a sa tlameha ho otla Lefika hape, ho qala ntho e ncha. O ne a tlamehile ho bua le bona, ka Lefika la mantlha. Oh, kea kholoa lea e tsoara! Moshe o ne a tlamehile ho bua ka Lefika la mantlha, le teiloeng; e sang ho leka ho Le tea hape, e sang ho leka ho qala ntho e ncha, empa ho bua le Ntho ea khale!

¹⁸² Molimo, nthuse! Le ha nka shoa ke futsanehile, sefaleng, ke tla bua ka Lefika la mantlha! Ke tla bua ka bophihlelo ba mantlha. Ke tla bua ka Mangolo a mantlha a ba babaletseng ka kolobetso ea Moea o Halalelang, “Bakang, e mong le e mong oa lōna, le kolobeletsoe ka Lebitso la Jesu Kreste tsoarelong ea libe tsa lōna, le tla amohela neo ea Moea o Halalelang.” Metsi a kamehla a phallang a tsoa Lefikeng a sa na le rōna. A tla hlahisa ntho e tsoanang. A tla hlahisa lipono. A tla hlahisa lipholiso. A tla hlahisa liporofeto. A tla hlahisa sohle seo ba se entseng.

¹⁸³ E ne re mohla Iseraele a qalang a tsepama Mangolong, a kena tseleng hape, ba honyeletse lefatšeng la pallo. Empa ba nkile lilemo tse mashome a mane.

¹⁸⁴ Pentekosta e batla e qetile lilemo tse mahome a mane kapa tse mahlano, e lelera lehoatateng. Khutlela Lefikeng! Le haufi hoo le ka bonoang. Ke lena, le ngotsoe hantle mona Lentsoeng. Moea o Halalelang o teng mona hantle o etsa seo A se entseng ka mehla, ka baka leo Metsi a sa Timeng a teng mona. Khutlela ho Oona feela, khutlela ho ntho ea pele, ea mantlha. E ne e le joang tšimolohong?

¹⁸⁵ “Be, ba tsukutlide matsoho le moreri”? Ha ho ntho e joalo. “Ba kolobelitsoe la lebitso la ‘Ntate, Mora, Moea o Halalelang’”? Ha ho ntho e joalo. Ha ho batho ka Bibeleng, hohle, kapa (ka thoko ho lilemo tse makholo a mararō) ka ntle ho Bibele, ba kileng ba kolobetsoa ka lebitso la “Ntate, Mora, Moea o Halalelang.” Ke tumeloana ea Katolike eo, ha se thuto ea Bibele. Lea bona?

¹⁸⁶ Ba ne ba e-na le Moea o Halalelang. Mehlolo e tla tsamaea le lumelang ke eona ena. E tla etsa joalo hape kajeno. Lefika leo le phela ka mehla joalo le ka mehleng, Lefika leo le teiloeng!

¹⁸⁷ Re se re, “Be, tloo ka koano u ingolise kerekeng ea rōna ea Pentekosta, kena lesakeng la rōna la Pentekosta.” “Che, tloo u ingolise le Baptise, kapa Methodise, kapa Presbeteriene, kapa Katolike.” Ke eng? Ke ho otla Lefika hape, ho leka ho qala ntho e ncha.

¹⁸⁸ Ba bolelle, “Bakang, le kolobeletsoe ka Lebitso la Jesu Kreste,” tšoareleng ea libe tsa bona, “mehlolo ena e tla tsamaea le ba lumelang.” Joale u khutletse tseleng, morao Metsing a tšoanang. Metsi a tšoanang a tla hlahisa lihlasimollo tse tšoanang. A tla babetsa ’mele ka ho tšoana. A tla hlahisa matla a hloekisang ka ho tšoana. A tla hlahisa matla a tšoanang a pholiso. A tla etsa se tšoanang le seo ba se entseng mohlang oo, hola feela re ka khutlela ho Moea o tšoanang.

¹⁸⁹ Bophelo ba morara bo tla beha merara. Haeba bo entse joalo ngoahola, bo tla beha monongoaha. Ke molao oa Molimo oo. Molao oa Molimo ke ho re, haeba sena e le sefate sa morara, se tlohele, se tla beha merara. U ka o nyalisa le ho hong hosele, empa u tlohele u tla khutlela ho merara e tšoanang hape.

¹⁹⁰ Re nyalisitse kereke le Bopentekosta ka ho tšoana, le Bobaptise, le Bomethodise, le Bopresbeteriene, le—le bo-Anglik’hene, le mokha oa mofuta ofe feela. Hobane’ng u sa e tlohele e le joalo? Khutlela sefateng sa Morara, o tla khutla ka Matla a le mang. Amen! Amen! Ke rata seo.

¹⁹¹ “Ho qala ntho e ncha.” Re entse joalo. Ha se . . . ho leka ho bontša boholo ba rōna. “Ngaka Sekete-le-sekete ke mothei oa ntho e khōlō ea Sekete-le-sekete le kereke ea sekete-le-sekete.” Ka hona, e ne e se eona.

¹⁹² Moshe o itsalo, “Ke tla ba bontša seo nka se etsang. Ke tla a hlahisa, leha ho le joalo!” A Le otla, a hana ho tsoa. A boela

a hoeletsa, “Ho bontša seo nka se etsang!” Molimo o ile oa mo sebetsa.

¹⁹³ U se ke ua nahana, haeba u “itšoarella ka mokha o itseng oa malumeli.” Molimo o tla u sebetsa. Ke hantle haholo. U tlameha ho khutlela ho ea mantlha. Ho khutla.

¹⁹⁴ Bua le batho feela. (Le se ke la ba bolella la re, “Tloong le ingolise kerekeng ea rōna. Tloong le thothokise tumeloana ea rōna.”) “Khutlang le bake, le kolobetsoe ka Lebitso la Jesu Kreste, tšoarelóng ea libe tsa lōna; le tla nka neo ea Moea o Halalelang, ha pelō ea hao e fēla e lokile. ’Me mehlolo ena e tla tsamaea le ba lumelang. Sehlopha sa balumeli, mehlolo ena e tla tsamaea le bona.” Hobane hobane’ng? Lefika, Lefika le teiloeng le Metsi a Hae a Bophelo a phorosela hantle, a hlahisa seo A se entseng motšeо koana. E loketse joalo feela. Oh, e.

¹⁹⁵ Re batla boipontši, ho thoe, “Re Methodise, le Baptise.”

¹⁹⁶ Bua le Lefika feela, Boteng ba Hae ha bo time. Se leke ho ingolisa le Lona. Ke ne ke iphumanetse “malulo” tlase mona. Se leke ho ngolisa le Lona. U ke ke ua ingolisa le Sena, ke ntho e le ’ngoe e tiileng. U ka ingolisa le Methodise, u ka ingolisa le Baptise, u ka ingolisa le Mapentekosta, u ka ingolisa le ma-Anglicans, empa u ke ke ua ingolisa le Sena. Che. U tlameha ho tlatsoa ka Sena. U se ke ua ingolisa le Sona; tlatsoa ka Sona feela. Ke phetho. Ke ho tlatsoa ka’ng? Ho tlatsoa ka Matla, ho tlatsoa ka Moea, ho tlatsoa ka Bophelo, ho tlatsoa ka thabo, khotsø, mamello, mosa, molemo, Matla a Moea o Halalelang bophelong ba hao, hobane Boteng ba ka mehla bo mono. Hopolang.

Ke tla tlameha ho koala hobane ho ntse ho phirima.

¹⁹⁷ Empa, hopolang, Lefika leo ha le a ba hloboha le ka mohla. Ha Le a ba tlohela le ka mohla. ’Me Kreste ha a re tlohele le ka mohla; Kreste o itse, “Ke tla ba le lōna ka mehla, ho isa le bofelong ba lefatše.” Na ho joalo? ’Me Lefika leo le hlotse le bona ho tloha koana Horebe ho ea Nebo. Le entse joalo. Ho theohela tlase Jordane, ke ha Le sa le teng. Oho Molimo, ke batla ho Le bona koana Jordane!

¹⁹⁸ Moshe, mohla a leng Jordane, Lefika le hlotse le eëna tsela eohle. ’Me o ne a eme holimo mono, a nyaretse e—e sehlopha sa batho ba oeleng mohaung le se hlobohileng Molimo. ’Me pelō ea hae e luma bona. ’Me a sheba holim’ a Jordane. Ke eo o eme Jordane. Jordane, ea moea, ke eona eo ke buang ka eona. ’Me o ne a eme mono, lefu le nanara le nyoloha ka sephaka sa hae. Empa o talima, pel’ a hae ’me ke ha Lefika robetse mono. A hata feela holim’ a Lefika, eaba Mangeloi a fihla, a mo jara a mo tlosa.

¹⁹⁹ “Ha Nka ke ka le tlohela ho le siea.” Ho sa tsotellehe ka moo linako li thatafalang, re tsofala ha kae, re shoa lefu la mofuta mong, le hopole, Lefika le tla ba teng Jordane. Ha Le ka ke la tloha kapa la hloboha. Hopola seo feela. Metsi a ka-Mehla a

tsoang Lefikeng a tla lula le rōna ho theoha le bophelo ba rōna bohle, 'me esita le koana Jordane.

²⁰⁰ Ha re inamiseng lihlooho tsa rōna. [Moena e mong phuthehong o hlahisa molaetsa oa boporofeta—Mohl.]

²⁰¹ E re Moea o Halalelang o sa haola har'a rōna, Moea oa Molimo o haola har'a rōna, ba teng mona hoseng hona ba sa tsebeng Kreste, 'me le a—ha le haufi le Lefika leo, ha u maemong a puisano le Lona hoseng hona? Empa u a tseba Le teng. Ak'o Le shebe ha le sebetsa hohle, ho 'Mona a haola a likoloha, ho Le bona le haola holim'a batho. Ke Metsi ao a leng Teng ka mehla. Eo ke pholoso. Ke Moea o khaphatsehang mehopeng ea bona ho fihlela ba sa khone ho ikhutsetsa, ntho e tlameha ho hlahisoa. Ha u Mo tsebe, na u ka rata ho phahamisa letsoho la hao le ho re, "Nthapele, Moena Branham. Joale ke batla ho Mo tseba. 'Me ke batla ho buisana le Eèna, 'me ke batla ho Mo tseba ka botlalo ba Moea oa Hae. Ke batla ho tseba hore O eme lehlakoreng la ka hantle, ka linako tsohle. Kea lumela O teng. Empa ke batla ho thea puisano ea khotsa. 'Me ke nyoriloe, ke nyoretsoe Molimo. Ke batla ho Mo tseba hantle ho feta"?

²⁰² Molimo a u hlohonolofatse, monghali. Molimo a u hlohonolofatse, monghali. Le uena, moena. Uena, yaa, morao motšeо koana. Tlase mona, leleiti, e. E, leleiti. Re bona matsoho a hao, le Molimo o a bona. Molimo a u hlohonolofatse, monna e mocha. Molimo a u hlohonolofatse. Le uena, leleiti. Amen. Molimo a u hlohonolofatse. Hlohonolofala, khaitseli. Motho e mong hape, nakoaneng ea khutso. Molimo a u hlohonolofatse, motšeо koana, mothaka e mocha.

²⁰³ E nahaneng. E nahaneng, Metsi a ka-Mehla a tsoang Lefikeng, oona Moea oo; oo A o mekelitseng ka ntle mono letsatsing leo la kahlolo ea Hae, mohla A ipelesang kahlolo ea rōna. 'Me lere la khalefo ea Molimo la Mo otla, 'me libe tsa hao li thatetsoe lereng leo, 'me le Mo otile, 'me Mali a Hae le metsi tsa phorosela li tsoa ho Eèna. A re, "Ntate, Ke neela Moea oa Ka matsohong a Hao." 'Me ka Letsatsi la Pentekosta, O tlide ho rōna ho re feheletsa leetong. 'Me O haufi haholo hona joale.

²⁰⁴ Mohla u nong u thakhoha, 'me u fapoha Hae hole; ho re, "Morena, Hae kea tla." Re sa se bina, haeba u ka rata ho nyolohela aletareng ua inehela, hape, moea oa hao, ho Kreste? Amen.

Ke fapo'ile Molimo hole, (hole le tsela)
Empa Hae kea tla joale;
Khale ke sitiloe (ke sebe) halelele,
Morena, hae kea tla.

Hae kea tla, hae kea tla,
Ha ke sa tla lelera;
Otlölla liatla Tsa lerato,
Joale, Morena, hae kea tla.

²⁰⁵ [Moena Branham o tsoella ho hōba, “*Morena, Hae Kea Tla*”—Mohl.]

²⁰⁶ Ho tsoa bashanyana ba bararō, ka potlako feela, likeleli li kolla mahlong a bona, ba khumama pel’ a aletare. Ehlile, ba a tšoarelloa. Ba tšoaretsoe le pele ba tloha litulong tsa bona, ka nako ha ba etsa qeto likelellong tsa bona tse nyenyane. Ba tlide kapele feela ba khumama mona, ho tsebisa batho, lehlakore leo ba le emelang, hoseng hona.

²⁰⁷ Kea kholoa batho ba holileng ba ka ratang ho etsa sena ba teng, ba ratang ho khumama fatše, le ho re, “Morena, ke—ke fapohile tsela hole. Esale ke belaetse haholo, ka linako tse ling ka fapoha ka kena sebeng. Joale ke—ke batla ho khutla pele ho phirima. Molimo, ke—ke rata ho tla. Ke rata ho tla feela ke khumama fatše.” Amen.

²⁰⁸ Joale, banana ba bararō ba Arthur Beam, ba batlang ba lekana, ba nyolohetse mona, ba khumama fatše.

²⁰⁹ Ngoanana e monyenyan ea sa tsoa fumana khaitseli e ncha lapeng o tsoela kapele. Tsatsi le leng ke sa lutse; Mof. Wood a nyoloha a mpolella, ha thoe khaitseli enoa o tla kena kokelong ho fumana lesea. Moea o Halalelang o itse, “Ba bolelle e tla ba moshanyana.” Eitse ha a hlahla, ke ha e le mothoana oa moshanyana.

²¹⁰ Hoseng hona ho bonahala e le bana, mathaka a macha a tsoang tlelaseng ea Khaitseli Arnold, ba nehela maphele a bona. Aletare eohle, letsohong la ka le letona, e tletse bana ba banyenyan. Ho ka ba monate ha rōna ba aletareng, re ka binela, batho ba bang bohole sefela, (ha ho joalo?) batho ba holileng.

Joale, Morena, hae kea tla.

²¹¹ [Moena Branham o qoqa le bana ba aletareng, athe ho ntse ho binoa, “*Morena, Hae Kea Tla*”—Mohl.]

Hae kea tla, hae kea tla,
Ha ke sa tla lelera;
Otlölla liatla Tsa lerato,
Morena, hae kea tla.

Sebe sea nlelerisa, Morena,
Empa joale hae kea tla;
Ho tšepa ’rato la Hao, le Lentsoe la Hao,
Joale hae kea tla.

Hae kea tla, hae kea tla,
Ha ke sa tla lelera;
Otlölla liatla Tsa lerato,
Joale, Morena, hae kea tla.

²¹² Ha re inamiseng lihlooho tsa rōna nakoana feela, thapelong, molemong oa mathaka a manyenyan.

²¹³ Ntate ea Maholimōng, haeba moso oa hosasa o ka chaba, ha Jesu a ka lieha lilemo tse ling tse leshome kapa tse leshome le metso e mehlano, bashanyana bana le banana ba tla isa Molaetsa ona melokong e tlang ho tla. Ha ke belaele kelellong ea ka, Morena, ka matsatsing 'ohle a ho phela ha bona ba tla hopola mohla ba neng ba nyolohela aletareng. 'Me ke mahakoe a manyenyane, Morena. Lipelō tsa bona tse ncha le tse bonolo li ahlotsoe hoseng hona. Athe ebile ha ba utloa Molaetsa 'ohle; ba sa tsoa tsoa phaposing, ba sa tsoa utloa Khaitseli Arnold oa rōna a bua; ba nyolohile ba teetse aletare hare mona, ba U nehela maphealoana a bona.

²¹⁴ Joale, Ntate, ke sa tsoa bolela hoba Moea o Halalelang o aha ka ho rōna. 'Me Moea o Halalelang ona, tumelo ka Moea ona, e etsa lintho tsohle. 'Me kea lumela horeng eona ena, U tšoarela sebe sefe seo ba se entseng. 'Me ke kōpa Uena, ka tumelo eohle e pelōng ea ka, U tle u baballe maphealoana a bona tseleng. Ba se ke ba kheloha Tsela le ka mohla.

²¹⁵ Ruri ona ke mohlolo oa ntho. Moea o buile hoseng hona, re tla "bona mohlolo." Molimo, haeba U qetile ho sebetsana le ba bang, nka bana ba banyenyane. Ka moo hoseng hona, memong ea aletare, ho seng motho e moholo le ea mong, empa seholpha sohle se nyolohileng ke bana ba banyenyane. Koana, e ne e le Molaetsa o moholo o thata ho utloisisoa, esita le ke batho ba holileng, empa bana ba tšoere Moea oa Oona. Re U leboha ka bona, Ntate. Ke ba nea Uena, joalo ka mohlanka oa Hao, joalo ka likhau tsa kopano ena; ehlide, ho hopola hobane Metsi a Bophelo a ka-Mehla a tla phalla le bona ha feela ba ntse ba phela. Hona joale ba be le tumelo ho se etsahalang feela, Molimo oo o ba hutseng setulong sa bona oa ba nyollela koano, ba be le tumelo ho Molimo oo matsatsi 'ohle a bophelo ba bona. Meea e menyenyane ea bona e isoe ho Uena ka letsatsi la lefu la bona; ho busetsoa 'meleng ea bona ka letsatsi la tsoho. Ke ba Hao, Ntate. Re U nea bona ka Lebitso la Jesu.

²¹⁶ Re sa inamisitse lihlooho tsa rōna. Ke tla kōpa bana ba banyenyane bana bohole aletareng, ba lumelang Jesu e le Mopholosi oa lōna 'me ke Eèna Ea le boleletseng, motše mono letšoeleng, ho nyoloha le ho khumama fatše aletareng ena. Na lea lumela Jesu o a le rata le ho tšoarela sebe sa lōna? Ke batla lōna bohole le eme ka maoto le shebe nqa letšoole. Sena, le ka bolella batho joalo hore le lumela Jesu o a le pholosa. Joale emang ka maoto a lōna, ke hantle, le shebe nq'a letšoel hantle. Lōna bohole bashanyana ba banyenyane le banana ba ratang Jesu, emang le shebe nq'a phutheho mono, e mong le e mong oa lōna.

²¹⁷ Ho ka thoeng ka lōna banananyana ba lutseng ka pele mona? Lea lumela na? Na le rata Jesu? Banananyana bana mona, na le rata Jesu ka pelō eohle ea lōna? Na le etsa joalo? Lea Mo rata na? Na u a Mo rata, moratuo? Emang holimo mona, ho tsebisa batho hore le rata Jesu. Molimo a le hlohonolofatse.

²¹⁸ Joale ha re retoloheleng ka mona re binele batho bana pele re tloha, “Jesu o a nthata! Kea tseba. Bibebe ea mpolella.” Lea bona? Ha re phahamiseng matsoho a rōna re sa se bina joale. Ho lokile, ha re se bineng.

Jes’oa nthata! kea tseba,
Bibebe e a bolela;
Bana ke ba Hae hape,
Ba fokola . . .

²¹⁹ Joale ka matsoho a rōna a phahamisitsoeng, ba bakae ka mona ba batlang—ba batlang ho ba mono?

E, Jesu oa nthata,
E, Jesu oa nthata,
E, Jesu oa nthata,
Bibebe e a bolela.

²²⁰ Joale bohole le ntšale morao. Kea lumela [Bana aletareng ba re, “Kea lumela”—Mohl.] Jesu Kreste [“Jesu Kreste”] ke Mora oa Molimo. [“ke Mora oa Molimo.”] Kajeno [“Kajeno”] ke Mo amohela joalo ka Mopholosi oa ka. [“ke Mo amohela joalo ka Mopholosi oa ka.”] Ho tloha kajeno, [“Ho tloha kajeno,”] ho ea pele, [“ho ea pele,”] ke tla Mo rata [“ke tla Mo rata”] ho Mo sebeletsa. [“ho Mo sebeletsa.”] Amen. [“Amen.”]

²²¹ [Moena e mong ka phuthehong o re, “Moena Branham, bana ba bane ba lutse pelōng ea nakong ena. Na u ka ba rapella?”—Mohl.] Ehlide bo, Moena Ben.

²²² Ntate ea Maholimōng, monna enoa o bona bana ba bang ba banyenyane ba e tla ho Kreste, o llela, joalo ka ntate, bana ba hae ba banyenyane. ’Me Moea o tlisiseng bana ba banyenyane bana aletareng, Moea oo o pholose bana ba hae, Morena. Aba sena. Re batla ho U nea bona, Ntate, ka Lebitso la Jesu Kreste.

²²³ Joale lōna bathoana le sa khutlela setulong sa lōna, ke batla mang le mang moleng oo a tsukutle matsoho le bathoana bana, kapa ho ba phathatsa ha ba khutla. Khutlelang bohole litulong tsa lōna, *ka nq’ a ena*. ’Me e mong le e mong nq’ a eo a phathatse bathoana bana. ’Me re le rata ka lipelō tsohle tsa rōna. Le litho tsa ’Mele oa Kreste, ka ho Oona hakaale ka rōna bohole.

Re ea koana Sione,
Sione e ntle, ntle;
Re ea koana Sione,
Motse o motle oa Molimo.

Tloong rōna, ba ratang Morena,
Thabo tsa lōna li tsejoe,
Binang thoko e monate,
Binang thoko e monate,
Le teele terone hare,
Le teele terone hare . . .

Ke 'mino o monate-nate oo! Ha re phahamiseng matsoho a rōna joale.

Re ea koana Sione,
Sione e ntle, ntle;
Re ea koana Sione,
Motse o motle oa Molimo.

Ha re tsukutaneng ka matsoho re sa bina joale.

Re ea koana Sione,
Sione e ntle, ntle.
Re ea koana Sione,
Motse o motle oa Molimo.

²²⁴ Joale ha re emeng re inamisitse lihlooho tsa rōna, re sa . . . E letse Moena Teddy, feela e . . . [Moena Branham o qala a hōba, "Re Ea Koana Sione"—Mohl.]

²²⁵ Mona ke tšoere likōpo tse 'maloa, le lisakatuku le lilō tse joalo. E ka ba li tsoa mose ho maoatle. Billy o n'a nts'a mpolella a re ba tšoere para ea libutšu tsa lesea e tsoang Engelane, li ka ba *kaalo*, mothoana eo o hlile o holofetse. 'Me re tla e rapella, le eona.

²²⁶ 'Me ka hona . . . [Ka phuthehong, Moena Ben o re, "Moena Branham, ntšoarele hle ho u kena hanong, empa rapela hle, hore ea thutseng koloi ea ka maobane bosiu, fendere e ka ho le letona kapele, e rapelle ho senoloa. Rapela Morena ho e senola."—Mohl.] Amen, Moena Ben, ruri ke tla etsa joalo.

²²⁷ [Moena Branham o tsoella ho hōba, "Re Ea Koana Sione"—Mohl.]

²²⁸ E re re sa hoanta, Morena, rea tseba Lefika le teiloeng le hantle pel'a rōna mahareng, Metsi a ka-Mehla a tsoang Lefikeng a tsamaea le Kereke. Oho Molimo Rabosafeleng, re lokollele, hoseng hona, tumelo ho Molimo ona o nang le rōna. Ke U tseba u tla etsa joalo, feela ka moo re ka fuoang mohau ho Uena, haeba U ka re tšepela Eona. Haeba U ka re nea Eona ka bongata, re ka tšoha re E sebelisa hampe, Morena. Empa haeba re fumana mohau ho Uena, e ke e etsahale.

²²⁹ Moena oa rōna o buile taba ka koloi ea hae e thutsoeng. Oho Molimo, re tseba monna eo a hloka chelete ea ho etsa lintho tsena. Ke U rapela ho ahlola nkekka eo, kapa ho hong, a bakele ketso ena, ho tla, ho thoe, "Moena, ke tla lokisa koloi ea hao, ke molato oa ka." Thusa Moena Ben le baratuoa ba hae.

²³⁰ Mona letsohong ke tšoere lisakatuku le likōpo, ka tumelo ho Molimo oo. Moshe o lumetse Molimo oo, 'me o tsetse leoatle. Daniele o lumetse Molimo oo, 'me o ntšitsoe lemeneng la litau. Shadrake, Meshake, le Abedneko, ba lumetse ho Eèna, 'me ba timile mollo. Pauluse o lumetse ho Eèna, 'me tsatsi le leng mohla litšebeletso li leng boima haholo 'me Pauluse a sa khone ho finyella batho, o nkile sakatuku, a re, "Kea lumela Molimo o e-

na le 'na." A beha lisakatuku le liaprone matsoho, eaba meeaa e mebe ea tsoa bathong, le maloetse le mafu a baleha ho bona. 'Me, Molimo, ke na le tumelo ho Molimo oo. Bobe bo balehe. Maloetse, mafu, lipabo, li balehe, Morena.

²³¹ U sa le Molimo o buileng le 'na tlase mane ka Topallo eo ea Mollo, tlase holim'a noka. Ke Uena Ea fehileng setšoantšo sa Hao mona le 'na, leboteng. U na le rōna, Morena. U teng-kamehla, esale Topallo eo ea Mollo. 'Me re noele Metsi a Lefika hamonate letsatsi le letsatsi, ha re kopana ka Moea. Hape, U teng mona. Re na le tšepo ho Uena, Morena. Re na le tumelo ho Uena. Re lumela U tla re tlotsa le ho re thusa. E seng ho tlotsisa rōna, Morena; e ka ba re etsisitse Moshe, mohla a sitiloeng. Re batla ho etsa se ka U thusang, Morena. Ke eona takatso ea pelō ea rōna, ho U thusa, haeba re ka khona. U re bontše, Ntate, sohle seo U batlang hoba re se etse.

²³² 'Me joale, ka khato ena ea tumelo, ke khalema maloetse a bapisoang ke lisakatuku tsena, le likōpo tsena. A balehe bathong. Ke tseba U tla e etsa, Morena. Ke e lumela, pelōng ea ka, U tla etsa joalo. Folisa maloetse 'ohle har'a rōna hoseng hona.

²³³ Pholosa ba phahamisitseng matsoho a bona, ba itlalehileng ba batla ho tla Lefikeng, ho fuoa Metsi. Molimo, ba ke ba nyoroe hakana kajeno, bophelo ba bona bo nyoroe hakaale, hoo ba tlang qoseha ho nyoreloa Kreste haholo. Aba sena.

²³⁴ E ba le rōna bosiusg bona, Ntate. Oho Molimo, ntumelle ho fumana, har'a likōpo tsena, se lutseng lipelōng tsa batho. Haeba ho se letho pelōng tsa bona, ka hona, Morena, U mphe seo nka se rerelang lipelōng tsa bona bosiusg bona.

²³⁵ Hlohonolofatsa Moena Neville oa rōna, le mohatsa'e, lelapa la hae; kerekana ea rōna, diteraseti tsa rōna, batikone ba rōna, litho tsa rōna. Le 'Mele oa Hao hohle, e ba le rōna, Ntate. Re ineela matsohong a Hao, ka Lebitso la Jesu Kreste.

Sione; re ea koana Sione,
Motse o motle oa Molimo.

Joale ha re se bineng feela, ruri, ho Eèna ka 'nete joale.
Lea bona?

Tloong bohole, ba ratang Morena,
Thabo tsa rōna li tsejoe,
Binang thoko e monate,
Binang thoko e monate,
Le teele terone hare,
Le teele terone hare.

Ka lihlooho tsa rōna tse inamisitsoeng joale.

Re ea koana Sione,
Sione e ntle, ntle;
Re ea koana Sione,
Motse o motle oa Molimo.



METSI A KAMEHLA A TSOANG LEFIKENG SST61-0723M
(The Ever-Present Water From The Rock)

Molaetsa wona, ka Moena William Marrion Branham, o rerilwe sethatong ka Senyesemane o reriloe Sontaha hoseng, Phupu 23, 1961, Branham Tabernacle, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org